

ASO LULU, 22 SETEMA 2021

Na toe faaauau Taulumaga a le Fono Aoaofa Faitulafono i le itula e 2:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: Ou te faasilasila atu ua toe amatalia nei Taulumaga o le Fono Aoaofa Faitulafono.

E manatu o lea ua matu i fau le taligasua a le paia o le Palemene, ua maua foi le malosia e faaauau ai le tatou galuega. Faamalo le onosai.

Ou te tapa lau Afioga i le Palemia mo se lafo, Hon Fiamē Naomi Mataafa.

LAFO MO LE TOE TEUTEUINA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, e talu ai o lea ua aloaia faaetulafono aso malolo e 2 mo le tuiga o le Koviti-19 mo taeao ma le Aso Faraile, ma e ono faatuai ai le faamoemoe o le Palemene mo le pasiaina o le Tala o le Tupe o lo o lauliliuina nei. E matau atu ua toaititi Afioga i Minisita o lo o totoe mo tali o mataupu sa laga e sui usufono mamalu. E molimauina foi o le tele o faauilavea o lenei Maota o lo o agai lava i mataupu e le i afea i a latou saunoaga, peitai, o lo o tuuavanoa pea le tatou Mal oi le agaga e amanaia ma faataua fautuaga a le la foi itu o le Maota.

Lau Afioga, e i ai le naunautaiga i le Malo e fia pasia le tatou Tala o le Tupe i le aso Fono lenei. O lea ou te fia faatu ai le Lafo Toe Teuteu mo tatou itula Fono e faapea, *O le a faaauau pea a tatou felafolafoaiga i taimi e tusa o le lafo ua faamaonia e le Maota ma tatou faaauau atu lava seia maea uma galuega o lo o i le Pepa o Galuega o le aso lenei, ona faatoa tatou tolopo ai lea i le po nanei.*

O le lafo lea lau Afioga.

Faaluaina e le Sui Palemia ma le Minisita mo Faatoaga ma Faigafaiva.

Na faamaonia le lafo.

FOFOGA FETALAI: Ia o lea ua faamaonia le lafo ma o le a faaauau le tatou galuega seia maea le faitauga faatolu o le tatou Tala o le Tupe nanei ona faatoa tolopo ai lea o taualumaga.

Ia, e faataatiaese taualumaga a le Fono Aoaio Faitulafono ua maea saunoa le Afioga i le Minisita o Galuega, Felauaiga ma Atinae Eseese.

A o le i tulai mai se tasi o Minisita e faaauau le tatou galuega, e i ai le faasilasilaga a le Nofoa. Ua manatu o le a tuuafu pea le saunoaga a le Minisita i mataupu sa laga e le Maota, ona tuu atu lea o le avanoa ia i latou o e na laga a latou mataupu i le taimi mulimuli e afu ai le folasaga a le Minisita, ona tuu atu lea o le avanoa ia i latou o e na lagalaga a latou mataupu. Ia o le avanoa lena e tuufesili ai i le Minisita ina ia tau tulituli atu le tatou taimi, ona o lea e maua o le a tuupo lava le tatou galuega nanei.

O le mea lea, o le faasilasilaga lena a le Nofoa, faamoemoe o le a outou faautagia mai. O le taimi lenei, o le avanoa lenei o lau Afioga i le Minisita o Pisinisi, Alamanuia ma Leipa mo lau saunoaga e talifuaitau ai foi i mataupu sa laga e sui usufono mamalu. Lau Afioga i le Minisita.

Tofa Hon LEATINUU WAYNE SOOIALO: Lau Afioga i le Fofoga Fetalai, faafetai tele mo le avanoa ua mafai ona tuuina mai ia te au i lenei itula o le aso. E talitonu le agaga ua matu i fau foi le taligasua i lau Afioga i le Fofoga Fetalai aemaise foi le Palemia ma le Sui Palemia ma le Kapeneta ma lenei Itu. E le gata foi i lea o lau Susuga foi Tuilaepa o le Taitai o lena Itu aemaise o le Sui Taitai o le Vaega Faaupufai e Puipuia Aia Tatau a Tagata.

Ae faafetai mo lou avanoa lau Afioga i le Fofoga Fetalai. Ou te talitonu o lea ua uma ona paelago le tatou aso, ua uma foi ona oooo saunoaga aemaise foi le mamalu o le tatou atunuu, aemaise foi o le mamalu o lenei Fonotaga.

Ae talitonu le agaga o le a taumafai atu se vaivaiga foi o lenei Matagaluega, ia po o le Minisita foi o lenei Sector aua foi se taumafaiga mo le tau faamalalamaina foi o fesili na tuu mai, po o i latou foi na fesiligia lenei Matagaluega.

Faafetai ia i latou ua maua se lauga ina ia fesili mai ai i le tulaga o le Matagaluega lenei. O le Matagaluega lenei e aupito sili ona taua, o Faalapotopotoga a le Malo. E 9 ni Matagaluega o i ai. A o nei foi Matagaluega uma, o le auaunaga lava aua le fesoasoani i le atunuu i ona vaega eseese uma lava. E tele lo latou sao i le tatou faigamalo. E le gata i lea o i ai faalapotopotoga a le Malo, o i latou e aoina tupe maua a le tatou Malo, ia ma faaputupu ma avatu i le Ofisa o Tupe aua le faaogaina o le tupe. E le gata foi i lea, o i ai foi Matagaluega e aafia ai le ACC, po o Matagaluega ia e aupito sili ona taua o lo o fesoasoani foi i ai tagata faigaluega ina ia mafai ona maua ai le tupe maua e fesoasoani ai foi i o tatou tagata.

O lo o i ai foi Matagaluega e aupito sili ona taua e tai pei o fale taalo lau Afioga i le Fofoga Fetalai, ia o lo o fesoasoani foi i faalapotopotoga taaloga o lo o i ai o latou fale taalo ina ia mafai ona faaogaina. E ui lava

ina tele ina faaaoga fua e le tele o Faalapotopotoga taaalo, ae talitonu le agaga o lo o tuu atu pea le fesoasoani a le Malo i le faaaogaina o fale taalo nei. Ia aemaise foi le Matagaluega o Fanua o Samoa, o i latou o lo o vaavaaia o tatou fanua lisi, aemaise... po o le SLC, ia, e tele lona sao i le tatou atunuu aua foi le tulaga i fanua.

E le gata foi i lea o lo o i ai le Matagaluega lea o Leipa pei ona outou silafia, tasi lenei Matagaluega aupito sili ona taua i le fesoasoani i le tatou atunuu i le tulaga i galuega, aemaise foi le galuega faavaitaimi o lo o i ai i lenei vaitaimi, ma tulaga eseese uma lava i le tulaga o le faaaogaina o tagata faigaluega.

E le gata i lea, o lo o i ai foi le Matagaluega o Fale, po o fale totogi lea a le tatou Malo po o le Housing. O le fesoasoani foi lea a le tatou Malo na faatuina ai lea Matagaluega ina ia fesoasoani mo tagata e autovaa mai ina ia manaomia se fesoasoani aua se fesoasoani atu a le Malo i le faatinoina o latou maota, ma laoa ma tulaga faapena, aemaise foi i latou o lo o vaai a tatou fale lisi po o fale rent ia o lo o faaaogaina.

Lau Afioga i le Fofoga Fetalai, aemaise foi le Games Authority. O i latou lea o lo o faia a tatou gambling. E ese ma le lelei o le tupe maua mai lea foi Matagaluega, e le masalosalo foi i le galuega ua uma ona faatinoina. Ia o mea uma ia ua uma ona faatulaga e le tatou faigamalo ua tuanai atu ina ia mafai ona ao ai ni tupe ma ni seleni e fesoasoani i a tatou taaloga. Ae le gata foi i lea, ia fesoasoani i le tatou faigamalo i mea o lo o manaomia.

E le gata foi i lea lau Afioga i le Fofoga Fetalai, o lo o i ai foi ma le kamupani vaalele a le tatou atunuu. O le kamupani vaalele o lo o i ai i le taimi lenei e aupito sili ona taua foi i le tatou tamaoaiga, aemaise foi o le faatinoina o femalagaaiga mai Samoa nei mo isi atunuu. E tele taumafaiga sa i ai muamua, ae talitonu le agaga o lenei vaitaimi, o lea ua toe i ai le taumafaiga a le tatou kamupani vaalele i le tulaga lea. Ou te talitonu ua uma ona faafesili mai ai nisi o i latou, ua uma foi ona avatu i ai le tali, o lo o i ai nei le Komiti Faapitoa a le tatou Kapeneta o lo o iloilo ina le tulaga lea i le tatou kamupani vaalele e pei ona outou silafia, ina ua tulai mai lenei faigamalo, ua uma foi ona i ai le fuafuaga a lena foi faigamalo, ina ia aumai le tatou vaalele.

Ia atonu e eseese o tatou manatu, e eseese foi finagalo o lena Itu aemaise foi se manatu o le Palemia i lenei Itu i le faigamalo, ina ia tatou toe tilotilo lelei i le tulaga e ao ona faatino ai lenei faamoemoe. O lea la ua i ai i le taimi lenei lau Afioga, e amata atu ai se folasaga i le tulaga lea ua i ai ina ia tilotilo le tatou faigamalo i fuafuaga mo le vaalele, mo le agai i luma, aemaise foi ia aua ne i afaina le tatou tamaoaiga. O i latou foi na i ai i totonu o le Komiti lenei, o i latou foi sa fautuaina le faigamalo i lena vaitaimi, aemaise le Komiti o Tupe. Ia, e faalogo tele matou i tulaga ia ina ia mafai ona aumai se faamatalaga sao ma se faamatalaga tonu ina ia mafai ona gaoioi ai le faigamalo lenei mo le fuafuaga mo le agai i luma. O i latou foi ia sa fautuaina le Malo, o lea foi ua toe fautuaina foi lenei faigamalo e ala i ni fautuaga lelei ina ia aua ne i i ai se afaina o le tatou faigamalo aemaise foi le atunuu i tulaga i mea tau tupe. Na aumai le

fuafuaga e fa vaiaso e fai ai se suesuega a le komiti faapitoa lenei a le Palemene, ae peitai, ona ua toe usuia le tatou Fono i lenei vaitaimi, o lea la ua i ai le tulaga, e le i maua se faaiuga a le komiti lenei po o le a le tulaga e faatino ai le faamoemoe lea. Ae talitonu le agaga...

Afioga Peseta Vaifou Tevagaena: Lau Afioga i le Fofoga Fetalai...

FOFOGA FETALAI: Malie le sui usufono mamalu o lea ua uma ona avatu le faasilasilaga a le Nofoa, se i maea lelei le saunoaga a le Minisita, ona tuu atu loa lea o le avanoa. E oo atu lava le avanoa. Se i tau faafflow le tatou galuega. Ia ae tuu atu lava le avanoa. E le mafai ona faagaloina sui usufono mamalu o le Palemene.

Ia, o se fesoasoani lena ma le agaga faaaloalo. Ou te fia fesoasoani atu lava i lau Afioga i le Minisita a o le i alu lau folasaga, ia faailoa mai pea sui usufono mamalu o e na laga lea mataupu ma lea mataupu, e faigofie ai le tatou galuega. Ma le agaga faaaloalo.

Tofa Hon LEATINUU WAYNE SOOIALO: Faafetai i lau Afioga. Ia e feoloolo i latou sa... o lea o le a ou tautala atu i le aotelega lau Afioga ina ia aafia uma ai i latou sa aumai a latou fesili. E taua fautuaga na aumai i le vaalele. E taua uma lava a outou fautuaga. O lo o faamau lelei i i fautuaga na aumai. Ia e aumai foi la ave i totonu o le komiti lea. E i ai lava le fautuaga aupito sili ona lelei na aumai, ona o le tele o isi fautuaga na aumai lau Afioga, na ona fai mai lava e aumai, ae po o le a le ituaiga faiga e aumai ai. O lea ua uma ona i ai aiaiga a le tatou Malo ua tuanai atu i aiaiga o le aumaia o le vaalelei, o lea ua taatia. Manaia. Ae a faapea tou te mananao e aumai le vaalele, ia aumai ai ma ni nai fautuaga i solutions. O le a le mea tatou te fesoasoani ai ina ia mafai ai ona faatino le faamoemoe. O lea ua i ai le aiaiga ua uma ona taatia ua uma ona faatinoina e latou ina ia sainia ai ni konekarate foi mo le faaaogaina o le vaalele mo le 6 tausaga. O lea foi ua taatia i le komiti ina ia tilotilo lelei i ai, po o le a le mea e mafai ona tatou faia ina ia mafai ona oo atu ai tatou i le 6 tausaga lenei ae le o afaina tele lo tatou tamaoaiga, aemaise lava le tatou faasoaina o le tatou tupe.

E i ai le fautuaga na aumai e manaia, aumai le vaalele ae a oo i le taimi e alu ai i fafo, ona faaoga lea e feavcai ai le cargo. Na pau lava le agaga na fai mai e faaoga nofoa o le vaalele ae tuu i ai uta i totonu. Ia ou te le iloa pe talafeagai lea tulaga, ae tatau lava, e aoga uma a fautuaga uma lau Afioga, ona e i ai le cargo e mafai ona aumai mai Niu Sila, a o i inei i Samoa, e pei e vaivai le tulaga lea i mea tau export. Ae a faapea la o i ai le tulaga lea o lo o taatia ai e faaoga luga, ae se i tilotilo lelei po o a aiaiga o le lisi pe mafai ona faatinoina lea faamoemoe pe leai. Ae manaia le fautuaga. E i ai foi isi na fautua mai e aumai le tatou vaalele ae totogi e le Malo le gau. Ia ou te le iloa po o se manatu soona tuulafoai po o se manatu na ona aumai lava e aumai ai i lea taimi, ae manumanu tele au nei i le tulaga o i ai ina ia mafai ona faataatia. Ae a faapea o i ai nisi manatu i le tulaga i le tatou vaalele, ia masalo pe oo atu i lea vaiaso ua

uma le iloiloga a le komiti. O le komiti foi lea, o i latou foi sa faia le fautuaga ile aumaiga o le vaalele. O lo o i ai le agaga fai mai e sese le taimi, it's a wrong timing but o le tulaga lava e i ai, ou te le iloa po o a fea se taimi. Ona o le tulaga ua i ai i le taimi lenei, o lea ua tatou... i totonu o le konekarate o le aumaiga o le vaalele, pei o le tulaga lea o lo o taumafai ai lava lenei vaega ina ia iloilo ina uma vaega uma ia aua ne i afaina tele si o tatou atunuu i tulaga ia.

Ia ona ou faasee mai lea lau Afioga i le Fofoga Fetalai, i le tulaga lea sa fesili mai ai latou e pei la o le Afioga ia Peseta i le polokalame lea o le aperenitisi. Ia faafetai i le Afioga ia Peseta sa laga le mataupu i le tulaga o matata eseese. O lo o faagasolo pea a tatou polokalame mo aperenitisi aua le aotauina ai o alii ma tamaitai i tomaitai i matata eseese. E 8 trades o lo o faatinoina ai i le taimi nei, ma o lo o i ai le faamoemoe e toe iloilo ma toe faapoopoina nisi trades fuafua i le manaomia o pisinisi ma le lautele o le atunuu. O lo o faaauau foi ona totogiina pea e le Malo le 50% o pili o tamaitai aperenitisi. E 30% e totogi e le employer ae 20% e totogi e tamaitai aoga o matata eseese ia e 8, e aofia ai le kamuta, fau meafale, gaosia o totoga o masini, palama po o le fai paipa, ia o soo uamea po o le uelo, inisinia o afa taavale ma masini, fai moli eletise, fai pusaaisa ma le inisinia. O lona uiga, o lo o faaauauina pea lenei matafaioi a le Matagaluega o Leipa mo le faaauauina o polokalame tau aperenitisi.

Ia, ona oo mai lea i le Afioga ia Mauu Siaosi o le Vaa o Fonoti, le Afioga ia Toeolesulusulu o Aana Alofi 4, o Fuaava Suluimalo mai Aleipata Itupa i Luga, Afioga ia Lupematasila Tologata mai Falelatai ma Samatau, ma le Afioga ia Leaana Posini, Lealailepule Aiafi, ia ma le Afioga ia Lautafi mai Satupaitea, ma Lauofo i Anoamaa. O lo o fesiligia ai galuega faavaitaimi i lenei vaitaimi o lo o ou i ai.

Mo le silafia, e ui i le tulaga o i ai le faaititiia o nei avanoa ona o le faamai o le Koviti-19, ae o lo o faagasolo lava tapenaga a le Matagaluega i feutagaiga i le faagasoloina o galuega faavaitaimi, o lo o ave foi i ai lau lagolago faapea le Afioga i le Palemia ma le Kapeneta. So, o lo o lagolagoina lava e le tatou faigamalo lenei faamoemoe. E tele foi le seleni ua mauaina ia i latou o lo o ua faimalaga atu i fafo i lenei faamoemoe. O lona uiga o lea tatou te lagolagoina lava le tulaga lea o lo o i ai. E taua nei avanoa e fesoasoani ai i le atiaeina o aiga ma si o tatou atunuu. Ua mautu atu i fale ma nofoaga, maua ai foi taavale, aemaise foi le faasilisili foi o aoga a fanau ma isi atinae o lo o manuia ai aiga o lo o faimalaga atu i fafo a latou fanau.

O lo o faatinoina pea le auaunaga a le Matagaluega i le tapenaina o pepa malaga ma tagata faigaluega mo Ausetalia ma Niu Sila. E pei ona outou silafia foi e leai se tupe maua a le tatou Matagaluega o lo o maua mai ai i lea fesoasoani, o le tatou fesoasoani fai lea ina ia fesoasoani ai mo i latou e prepare ai i latou mo le taimi e tuuvaa ai po o le pre-departure orientations.

Mo so o se aumalaga lava ae le i tuua Samoa nei, o ia aoaoga e aofia ai le faailoaina o tulafono ma aiaiga o nei galuega konekarate aemaise foi tulaga uma o tulafono ma le siosiomaga i atunuu i fafo o le a malaga i ai.

E tapena foi e le Matagaluega insure o tagata faigaluega ma nofoaga o nonofo ai i fafo. O lo o lelei pea le aiaiga o nei galuega o lo o avatu i ai tatou fanau. Mo le silafia, talu mai le vavao faava o Malo i le faaiuga o le tausaga ua tuana'i atu, mo Niu Sila, e ova ma le 700 tagata ua toe malaga atu i lalo o le galuega tau faatoaga, le RSE i galuega fasimanu. Ma o lo o faamoemoe foi e i ai se isi malaga faaopoopo mo Niu Sila i le masina o Oketopa. O lona uiga, o lenei lava e faagasolo lava le avega o tatou fanau po o i latou o lo o galulue i fafo pe a oo atu i ai ua toe sologa lelei le faamai o lo o aafia ai nei Niu Sila. O lo o i ai foi nisi galuega faakamuta e toa-20 ma o lo o toe aoga ai foi faapea foi galuega fasimanu e silia ma le 250 o lo o galulue ai.

Mo Ausetalia, talu mai Aperila, e oo mai i le masina nei ua silia ma le 1,000 tagata ua malaga atu mo galuega i Ausetalia. E i ai le faamoemoe e maua foi nisi malaga faaopoopo i Ausetalia i masina o totoe o lenei tausaga. O lona uiga, o lea lava e i ai le avanoa e mafai ai ona o atu o tatou tagata i tulaga ia. Ia o le agaga foi lea ina ua oo mai le kamupani vaalele ma aumai le latou business plan o lo o lavea ai la faigamalaga nei i le taimi e tuua ai pe a oo i le taimi e aumai ai le tatou vaalele.

O le talosaga ma se fautuaga ina ia lava le onosai a le mamalu o le atunuu, ona o le utiuti o avanoa i lenei vaitaimi. E pei ona outou silafia, o le pikiina po o i latou e o i nei avanoa, e le faia i luga o se lottery po o se tulaga faapena ina ia mafai, e filifili lava e le Matagaluega i luga o le agavaa ma le lelei aemaise le tulaga lea o le feoloolo o le igilisi. E le faapea ia lelei tele, a ia feoloolo ina ia mafai ona faatino le galuega ne it e i ua fai atu e tau le apu, ae alu lote le mamoe.

O lo o faaauau foi taumafaiga e saili avanoa faafaigaluega i isi atunuu pe a maua ai ni avanoa. Ma e taua tele le auaunaga e fai fua, cost free o lo o fai e le Matagaluega i le taimi lenei, lea o lo o faatinoina e le Matagaluega mo tagata ia e tapena. Ae ou te faaopoopo atu, o lo o i ai foi o tatou tagata o lo o auina atu i Tutuila mo galuega ia faavaitaimi i Tutuila. E i ai foi isi ua talosaga mai ina ia mafai ona toe faafoi atu le polokalame lea i tua i nuu i tua aemaise foi Susuga i Faafeagaiga e masani ona... lea foi sa afea e le sui usufono mai Falelatai ma Samatau e faapea o latou sa amataina, e i ai se tamalii sa amataina mai le latou itumalo, a ua le toe faia. E faamalulu atu ou te le iloa po o ai na aveeseina lau Afioga, ae ou te iloa o lea e lelei lava le faatinoina o le tulaga lea e i ai.

Ia, o le auiliiliga. Mo le silafia, o polokalame o galuega faavaitaimi, na uluai amata mai o se vaega o le PACER PLUS lea o lo o i ai Samoa. Ma e momoli faafetai le agaga faafetai i le Malo o Ausetalia ma le Malo o Niu Sila ona o le amanaiaina o Samoa i nei galuega e oo mai lava i le taimi nei. I Niu Sila e pei ona silafia, o le RSE, na uluai amataina i le va o Samoa ma Niu Sila i le tausaga e 2007. O lona uiga ua leva ona faatinoina lenei faamoemoe, e faafaigaluega ai tatou tagata i faatoaga, tau apu, pea ma isi foi tulaga faapena mo le 7 masina. O le isi polokalame e aafia ai le Pacific Trade Partnership initiative o lo o faigaluega ai le au kamuta, na amata ai i le tausaga e 2016, 2017 ma le 2018, ma e le o toe

faaauauina, seivagana foi ua i ai se manaoga o Niu Sila, e pei o le toe fausiaina o Canterbury lea sa aafia i le mea lea o le mafuie.

O le isi polokalame o le approval and principal, na amataina i le 2006 mo galuega fasimanu mo le sili atu i le 1 tausaga ma oo atu i le 3 tausaga. Ia, o lona uiga, o lenei lava polokalame ua leva ona faatinoina, leva ona faatino. Ia mo Ausetalia na amata i le seasonal workers programme, po o le SWP i le tausaga 2012, faafaigaluega ai tagata mo le 9 masina. Na amata i le Pacific Labour Scheme i le tausaga 2008, e mafai ona faigaluega ai tagata mo le 1 tausaga pe oo atu i le 3 tausaga. O lo o faagasolo pea tapenaga mo ia galuega, ma o lo o ave le faamuamua ia i latou e leai ni galuega.

O le aofai o tagata faigaluega i galuega faavaitaimi mai le tausaga faaletupe 2019/2020, e 3,408 le aofai o le atunuu sa galulue i galuega faavaitaimi i Ausetalia ma Niu Sila. O Ausetalia e 672, a o Niu Sila e 2,736. Faatusa i le 3,322 i le tausaga faaletupe 2018/2019, Ausetalia e 692 ma Niu Sila e 2,512.

Tupe Maua. E matautia tupe maua, ma le \$200 miliona pe \$210 miliona tupe maua tuufaatasi a tagata faigaluega i le tausaga faaletupe 2019/2020. Ae silia i le \$198 miliona i tausaga faaletupe 2018/2019. O lona uiga, ou te le o iloa, vagana se isi e le o i ai tele se agaga i le polokalame lenei ona ese ai lea o sona finagalo.

Sa i ai foi le taimi sa faaalua ai se finagalo o se tasi o Minisita i lenei Itu i le tulaga lea o le ave o tatou tagata i fafo, a o lea sa saunoa le Minisita i le tulaga i le agai i luma ina ia aua ne i tatou faamasani ai pea, aua o lo o i ai foi le popolega o le Chamber of Commerce po o i latou o lo o faia hotels ma tulaga faapena, a toe lelei mai a tatou hotels ma turisi, ia o tagata uma ia sa faigaluega i tatou faletalimalo, o lea ua aafia ma le toe mafai ona toe maua le avanoa. Ae talitonu o lo o i ai lava le agaga ina ia nonofo pea nisi e tautua o tatou aiga aemaise foi o le tulaga lea o lo o i ai. E tai pei o le tulaga lea o lo o i ai le \$51 ua uma ona faavagavaga foi e lenei faigamalo o lo o i ai i le taimi lenei ina ia mafai ona tuu atu i tua i nuu i tua aua poloketi mo i latou o lo o nonofo i inei, po o le tulaga e i ai. Aua a faimalaga le tama o le aiga, e tatau foi ona i ai se mea e galue ai le tina o le aiga. Ia ma i ai se tulaga ina ia mafai ona galulue uma itu e lua, ae aua ne i galulue na o Niu Sila, ae nofonofo le tina i Samoa e leai se mea o faia.

Na pau lava si faafitauli o lo o i ai, o le tulaga lea o le alu atu o le tama i o ae fiu le tina e toe faatali. O lo o ua i ai nai faafitauli ua uma ona oo atu ia te au i le tulaga lea na alu atu i inei o toalua ae alu atu i o ua single le toeaina, ia ona fai ai lea o nisi tulaga e lelei ai but o le polokalame ia o lo o lelei pea.

Ia, o le tulaga o falefaigaluega, o le saogalemu, soifua maloloina, e pei ona fesiligia e nisi o i latou. O lo o faaauau pea asiasiga ma nisi o faalauiloa a le Matagluega i so o se falefaigaluega i totonu o le atunuu. O lo o tuuina i ai lipoti o asiasiga i vaega e ao ona faaleleia, ma e tulituliloa foi.

Sa i ai foi nisi e fesili mai i le komisi o faiga faatauvaga ma le puipuiga o tagata faatau, ia po o Samoa Competition and Consumer Protection Commission. Ia e faafetai atu i lau Afioga Fonotoe, aua pei o ia lea sa aumaia le mataupu lea i tulaga ia. Faafetai foi mo le fautuaga, ioe. E ese ma le manaia o au fautuaga lau Afioga i le sui usufono. Ia, maumau e pe a na faaoga lau Afioga e lenei itu, ae faigata o lena ua i ina i lena itu, ia atonu e aoga i se isi tulaga. Faafetai i lau Afioga, ua faamauina lou finagalo ma ua i ai foi tapenaga mo le toe faagasoloina o galuega a le komisi i faiga faatauvaga.

Mo le silafia, e le o toe i ai se komiti mo le tau o oloa po o le Price Control i le taimi lenei talu mai ona amataina galuega a le Komisi o Faiga Faatauvaga, ae talu ai ona o le faamai o le Koviti-19, o lea ua toe faatino ai le Poloaga ma le tau o oloa, taumafa, basic food items i lalo o le SOE – Faalavelave Tutupu Faafuasei. O le agaga ina ia taofiofia ai le soona siitia o tau o oloa. O lona uiga, o lea e maua lava e le Matagaluega lau fautuaga lau Afioga. Ia o lau Afioga foi sa i ai i le Matagaluega, o lena e lava lou silafia i le tulaga lea, ia ae aumai i i lau fautuaga. Ou te talitonu a i ai lava foi a manaomia lava se fesoasoani ia ua fesili atu i lau Afioga.

Komiti Faatino o le CODEX faapea galuega o taiala, standards. O lea foi o lo o faagasolo le galuega a le Komiti Faatino o le CODEX lea o lo o aofia ai sui o le faalapotopotoga tumaoti faapea ma le Matagaluega o le MCIL, Matagaluega o le Soifua Maloloina ma le Matagaluega o Faatoaga. Ua maea ona tapenaina taiala, standards mo le fuamo, ava ma le nonu, talo, aafia ai foi ma tanevai mo le suavai taumafa. O lo o i ai foi le fuafuaga mo le tapenaina o ni taiala mo isi oloa o lo o gaosia i Samoa nei, mo le fofoga taumafa, ma nisi foi o oloa o lo o faaogaina tele e le mamalu o le atunuu. O lo o lagolago foi le MCIL i le Matagaluega o le Soifua Maloloina i tulaga uma o le Tulafono o taumafa 2005, e aofia ai labels ma tulaga faapena uma pei ona fesiligia.

O lo o i ai foi se fesili sa aumai po o i ai nisi trade fou e mafai ona aoaoina ina ia mafai ona expand atu ai i tua tulaga ia i le tatou RSE. O lo o i ai foi kamupani ua uma ona faafesootai mai ia le tatou Matagaluega e fia faia ni aoaoga po o se school of drivers and machinery operators, ina ia mafai ona aoaoina ai o tatou tagata i mea ia o masini, loli tetele aemaise masini ma tulaga faapena ina ia mafai foi ona faaofi latou i totonu o le polokalame lea, ia ma taunuu atu ai i Niu Sila. Ia e lelei totogi o trades na. A faapea foi o lo o manaomia e kamupani e ona galuega ia e o i ai tatou tagata faavaitaimi, ou te talitonu e tataua ona eseese rates o i latou e lelei le aveave loli ma aveave taavale ma masini, aua e leai se tatou aoga faapena o i ai. Ia ae o lo o aumai le talosaga ae se i tilotilo i ai le Matagaluega po o fea se auala e mafai ona aumai ai i totonu ina ia mafai ona aoaoina ai a tatou fanau ae le i o oi le taimi e tuua atu ai tatou mo atunuu i fafo.

Ia ona oo mai lea i se fesili na tuuina mai e le sui usufono lau uo o Sula, i le tulaga i le fanua i Vailele. Ia faafetai mo le faafesili lau Afioga. Ia ua e tatalo mai nei e \$8,000 se tupe e mafai ona tuu atu e faatau ai fanua pe lisi atu ai fanua ia. Ia sa ou fesili i le Matagaluega, po o a valuation o

fanua ia e i Vailele. Lau Afioga, o lo o e nofo i luga o fanua aupito i sili ona taugata ia Samoa atoa, e tai \$140,000, tai \$150,000 i le eka. O valuations ia o fanua ia ua e tatalo mai i ai. A faapea la o lo o e tatalo mai e avatu i le \$8,000, a o lea o lo o faapau atu ia outou i le 70% i le \$35,000, ia, ona i ai lea o se fuafuaga faapena e i ai. Ia, ae taatia mai, taatia mai lou manaoga, se i vaai pe i ai se auala e mafai ai ona fai lea ituaiga tulaga matautia faapea lau Afioga, e \$140,000 ae te manao e ave i le \$8,000. A o lea foi ua avatu, a o le fanua lena e te nofo ma oe seia oo mai lava le faavavau, faavavau, faavavau lava amene. E te le maua se mea e te maua ai se fanua faapena, e le mafai foi ona aveesea e se bank ma tulaga faapena. O aiaiga lea na faatulaga i le tulaga lea, e ese ma le manaia i le faatinoina. Ia, ae uso, ia, o lea o lo o tatalo mai Vailele i le 80 eka, lea ua taumafai le Malo e faatino lea tulaga, ae le o malilie lava i le tulaga ua uma ona avatu i ai. Sa i ai foi le fuafuaga sa fai le matou talanoaga ma le Komiti o Fanua a Vailele, malilie maia i le 80 eka ae taatia pea isi tamai eka ia e i autafa, atonu ua se atu i ai nisi o lou itumalo po o lou nuu foi, ae tuu ia i ina, pau lava o le mea ia outou usitaia tulafono a le nuu, i tulaga o vavao ma tulaga faapena ina ia mafai ai ona nofo filemu le tatou atunuu ma tulaga faapena. Aua a faapea e le finagalo lava i ai Vailele i le tulaga lea, masalo e mafai lava ona fai atu le Malo e toe aumaia ia fanua o le SLC ae toe faasoaso lelei atu, ae le o i ai la se tulaga faapena. Ia, pei o le tulaga lena lau Afioga.

Ia, ona oo mai lea i le tatou maketi. E momoli atu le faafetai i lau Afioga i le Minisita sa i ai muamua lau Afioga Lautafi. E tele le galuega, e leitioa foi a e lauao sinasina ona o le faigata ma le fita. Talu lava ona ma momoe ma le vaalele, e le i lelei se ma mafutaga ma si ou toalua i le taumafaiga, ae talitonu, tatou te tatalo i le Atua e fesoasoani mai. Ia fesoasoani foi i le Komiti o lo o fautuaina le Kapeneta o se tulaga lelei ina ia faamalieina ai tagata uma i le tulaga lea.

A o le tulaga i le tatou maketi i Savalalo, ou te talitonu sa i ai le fuafuaga a lena foi itu ina ia sii le tatou maketi i Sogi. Sa faia le matou survey ma matou talanoa ia i latou o lo o faatauina ma faia a latou flea maketi, e tele lava i latou po o le 90 o i latou o lo o tetee e le lava le latou tupe maua i tulaga ia. Ae sa matou toe asiasi ma matou maua ai, o lo o i ai le plan ua uma ona faataatia e lena itu i se fale manaia e fau i le mea o lo o i ai. Ua omai foi ma le Ofisa o Niu Sila ma aumai le latou fesoasoani tau seleni ma matou mananao ai ina ia toe faatulaga pea le fale lea, ae se i aumaia le latou fesoasoani e fesoasoani ai i le toe fauina. O lea la ua i ai le fuafuaga i le taimi lenei, sa i ai le Komiti Faapitoa foi ua uma ona latou iloilo, o lea la ua i ai le tulaga ina ia toe foi le tatou flea maketi i Savalalo i le mea na i ai. Taatia le fanua lea i Sogi o le fanua lava lena a le Malo o lo o i ai ma tau fuafua pe i ai se isi poloketi lelei i ina ina ia aua ne i aafia atu ai nisi meatotino e tai pei o meatotino a le TATE ma tulaga faapena, aua e tele ona fesuaiga o le a i ai. Ae tatou toe foi i tai i le mea na i ai le flea maketi, atonu o lo o ogatasi foi ma le poloketi manaia lale e taatia mai o le waterfront project, e talitonu e ogatasi uma ai fuafuaga ia e i ai.

Ia e pei o le fuafuaga la lena, ae o lo o i ai nei le plan o lo o faataatia se i tusi le ata ma se i tilotilo i tupe e faatino ai. Ia o la e foi ua i ai le tupe a le SLC ua uma ona faataatia, ua uma foi ona i ai le fesoasoani lea a Niu Sila, toe lava o le aumai ona faatinoina loa lea o lea faamoemoe lau Afioga.

E i ai foi le isi fuafuaga sa i ai ona e matauina e au nei o le Minisita o le Matagaluega lenei, o lo o fai le tauvaga maketi a le SLC ma le ACC. E fai maketi mai le SLC i i, ae fai maketi mai le ACC i i. Ia sa ou talatalanoa i ai po o le a se latou finagalo po o ai e lelei lana fai maketi ae alu ifo e fai uma le maketi, ae toe foi mai le isi e sau e alu e fai lelei le mea na tofia i ai ia e sau e galue ai, ae le mafai ona tauva uma Matagaluega ia e 2 i lalo o le sector ina ia fai ai ni maketi.

Ia o fuafuaga na mo le agai i luma lau Afioga, atonu ona o lea faatoa 6 vaiaso talu ona tulai mai i lenei tofiga taua, ia o lo o tau faamasani foi. Ae o le mea aupito sili ona taua ina ia sao a tatou faaiuga e fai aua le agai i luma.

Ia e pei o se faamatalaga lea, ae masalo ae ou te le i nofo i lalo, e tatau lava ona ou afe atu pea i lou itumalo, lou itumalo o Faleata 2. E tatau foi ona momoli atu ai se faafetai tele...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e i ai nai mataupu ia ou te fia laga.

FOFOGA FETALAI: Ia, talu ai o lea ua maea mai le folasaga a le Minisita, toe o lona itumalo, e manatu foi lau Afioga se i tuu pea le avanoa i lea foi itu ona fai mai lea o lau folasaga i lou itumalo ma faauma ai lou taimi. Ma le agaga faaaloalo lau Afioga i le Minisita.

Susuga Hon Tuilaepa Fatialofa Auelua Sailele Malielegaoi: Faafetai. Ou te faafetai atu i le Minisita. E taua tele lou faalogologo atu i le faasolosolo mai o ana mataupu. Faamalo le tofa.

E i ai nai vaega ia e na ona avatu pea o se tuualalo, i le matau atu i nai o tatou tagata ia e o i galuega nei faavaitaimi o lo o i ai lava le mataupu lenei, e le uma le laga pea ia i latou o kamupani nei, ona o le agaga foi lea o kamupani nei ia toe foi atu le 60% o i latou sa i ai muamua, toe foi mai ona foi atu lea, 60%. E 40% tagata fou. Ina ia i ai le avanoa mo isi tagata fou, e i ai lava le fautuaga e faatalanoa pea ma latou nei e ana kamupani, toe tuutuu atu i luga le pasene. O lona uiga e le na o le 40 po o le 60% tagata fou, se i faasalafa le manuia i isi o tatou tagata, ona ua matauina o le faiga faavae lea a kamupani nei, e o atu pea o atu pea isi, ae o lea e taumafai atu isi e fou. E i ai le itu taua o lo o aumai e kamupani nei ina ia laitiiti ai le tupe alu a latou i le toe faamasani. A o le tulaga lava ia, ua iloa e latou o tatou tagata e galulue tele. Ia na ona faataatia atu i ou tafatafa. Atonu foi o se mataupu e mafai ona ave i luga i le va faa-Palemia mo le faasalafa atu o le manuia i isi o tatou tagata.

O le vaega lona lua, o le itu lea sa lagalaga foi i aso ua tuanai, e le taofia ai le toe ave pea, o i latou o lo o le mafai ona faatoa le tatou 1,100 foi

lea i le tausaga ona o galuega, ou te manatua sa i ai le taimi na maua ai ma le avanoa o nisi o i latou nei na malaga i fafo, ma ua matauina le lelei o latou galuega fai. O le manatu, afai ua o atu tatou tagata ia e galulue i le RSE ae aliali mai ua lelei tele, o nisi ua maua a latou galuega faafomeni, pe mafai ona faamatuu loa i ai le vaega o le tatou quota ae avatu loa le toalua ma le fanau. O se isi taua le itu lea ou te iloa e le o mafai ona atoa le 1,100 i le tausaga ona o le tulaga o galuega.

Ae i ai foi le manatu se i toe silasila ane lava i tagata nei e ave, i le itu lea o faiaoga, nurses ma leoleo. O le tasi lena auala o lea e aafia ai tatou faiaoga, ona e mama atu i i le 1,100. Na ona tuu atu pea i ina e lagalaga ane i le itu lea o le sootaga o tatou tagata i fafo ae afaina ai services ia taua a tatou.

O le tulaga i le maketi, e tele lava le taua o le site po o le tulaga fale lea sa i ai fili makeki. O lea a matau mai, o lea foi ua toe moomia nisi fale o le Malo. Ae o i i le itu lea e road frontage lelei mai lava i luma o le auala faalava lea e sau i Mulinuu ma le auala lea e alu i o ae sau mai uta i Fugalei. O le matua manaia o le location, premium site mo se Maota o le Malo, faafogafale po o se fogafale 4. Aua masalo pe maua se 10 eka, ae mafai ona faalautele auala se 3 e agai atu i ai i tua, o la e i ai possibilities e mafai ai ona faagagai atu auala na i tua I le nofoaga I Sogi e sui ai le Fili makeki.

Lau Afioga i le Fofoga Fetalai, o nai vaega na o lea e avatu ai le tuualalo. O le itu foi i le SLC ma le ACC, ona o tulaga sa sau ai i le amataga ma le faatupega. E pei o itu na taua na mafua ai ona tulai mai Faalapotopotoga nei e lua o lo o faatino ai le faagaoioiga o maketi nei e lua.

Lau Afioga i le Fofoga Fetalai, ae momoli atu le faamalo i le Minisita. O nai manatu e faufau ai ou tiute mo le agai atu i le lumanai.

FOFOGA FETALAI: Malo faafetai. Ia ou te iloa o lea ua kava uma lava e le Taitai o le Itu Agai outou finagalo ia na faaalua, pe leai? Ia, o le a avatu le avanoa lea lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Faafetai mo le avanoa. Ia aua o lea foi sa ou lauga tonu lava i vaega ia pei foi ona saunoa le Afioga i le Minisita e tali mai i nisi tulaga. Ae faamalo faafetai. Faafetai foi i lau Afioga i le Minisita mo le faamaninoga o nisi vaega sa afea i le lauga autu o le Tala o le Tupe. Ae faafetai foi i le vaega lea o le itu a le RSE.

O le a ou le agai i isi vaeg aia ua uma ona saunoa i ai le Afioga i le Taitai o lenei itu, ae faamalo faafetai o lea ua faamauina o le faitauaofai o tatou tagata ia ua o i fafo pe 3,400 ma ona tupu, agai atu i le 3,500, a o lea foi e pei e matau atu, se i toe silasila ane lau Afioga, pei o lo o fai si maualuga atu o isi atunuu ia e i ai Vanuatu ma isi atunuu o le Pasefika. Ou te le o iloa i ai i tulaga o avanoa, pe i ai nisi avanoa faaopopo mo tatou i Samoa nei. Aua pei o lena e silafia le tulaga o lo o tele lava o tatou tagata o lo o fia maua avanoa ia i Niu Sila po o Ausetalia ia po o nisi foi

atunuu e maua ai ni avanoa e tatou te agai i ai ma faaaoga ai foi lo latou tomai ma le latou avanoa, ae saolele le saunoaga a lau Afioga i le vaega foi lea o le hospitality, tagata ia e galulue i mea o faletalimalo, faleaiga.

Aua ua faapena ona toatele tatou tagata e faauu mai le aoga foi lea ua faatu iinei ia tatou o le APTC, ma tasi lea matata o lo o aoaoina i le tatou APTC, ma o se faailoga Ausetalia le faailoga, aua o le aoga o lo o faapena ona faatautaia ma faafoefoe i lalo o le fesoasoani a le Malo o Ausetalia. E moni la o lo o i ai se atugaluga faapena o nai faletalimalo, a o lenei lava vaitau, pei lava foi ona e saunoa ona o le faamai. A o le fautuaga lava ia ma le tuualalo, se i silasila pe maua ni nai avanoa foi nei pupuu po o short term ina ia mafai ona toe foi mai. Aua o le taua ia o le vaega lea, le industry lea pei lava ona e silafia foi, ua tele tausaga ua tuanai atu o ave pea e le faigamalo sa i ai le faamuamua ma le faataua i lea foi vaega o le tourism industry. O le taimi foi o tatala a tatou borders ma tele tagata tafafao maimoa mai Samoa, aua tasi lea tupe tele lava a le tatou atunuu sa maua ai. O le faamoemoe la ma le agai atu i luma, aua o lea e pei e i ai se taimi o le lumanai ona toe tatala lea o tatou borders pe a faapea e talafeagai i tulaga o tuiga ma mea uma faapena, ma vailaau, ia afai e toe maua se avanoa, a o lea ua lava tapena tatou. E le taufai atu foi i lau Afioga, o lea foi ua e oo i isi atunuu o le Pasefika e i ai Fiti ma le Atu Kuki, o lo o malosii foi le latou tourism industry. O le vaega lea o le taua ia o le service lea, i tagata ia e galulue i faletalimalo, o faleaiga aua tagata tafafao maimoa atu. A short term, e pei e i ai se talitonuga foi lele a short e vave ona toe foi mai, ae i ai la le tulaga foi lele ua maua le experience i fafo, e pei o se experience foi lele e siitia le tulaga o latou foi tomai i latou skills ia, e aoga tele mo tatou ma le tatou foi industry. Ia a ua e saunoa foi i le tulaga aua e pei o au lea sa fesiligia pe mafai ona faalatele atu i isi matata le polokalame lenei. O lea la sa e taua le kamupani lea ua ofoina se aoga foi lea e aoao ai le aveina o masini mo lifi ma ituaiga loli, masini eseese, aua o atunuu i fafo i Ausetalia ma Niu Sila, e manaomia lava le laisene e faafoefoe ai na ituaiga o masini eseese. Ae faafetai o se aoga taua foi lea aoga. Ma e lelei foi mo tatou, e maua ai foi lea ituaiga matata aua e faigofie lava mo tatou. Ae a maua se avanoa e toe talatala atu ai i isi foi ituaiga matata e pei o le uelo ma le faimoli, fai eletise po o ni mea faapena. Ae o foi lea faavaitaimi ae toe foi mai, e fesoasoani lava i le faaleleia o le latou foi skills ma le experience. Ae faafetai o lea ua faaaau le competition ma le Consumer Protection Commission lea sa laga atu foi i lau lauga o lea na ou tilotilo i ai o le SOE i le vaitaimi lenei o lo o faaaau ai le Price Control Board, le komiti lea e faatulagaina le tau o oloa po o le basic food items.

Ia, faafetai. A o le tulaga ia lau Afioga o lea sa i ai le vaitaimi sa i ai le fesoasoani sa ofoina mai e le Vaega a le Ofisa o le ADB i Sini mo le faavaeina o se komisi faapea i totonu o le tatou atunuu. Ou te le iloa po o tumau pea le ofo lena a le ADB. Ia atonu o se ofo lelei foi lena, po o se ofo fua foi lele e i ai o latou tagata faapitoa mo le vaega lea. Ae omai e fesoasoani mo le faavaeina o le tatou... Ae faafetai i le tulaga o le tatou flea maketi leaga o lea foi sa ou taua le flea maketi lea i Sogi. Ma lo

faafetai. Pau lava le mea e fia malamalama ai po ua i ai se fuafuaga lau Afioga ma le Mal oi se... po o le a se poloketi, a o le a se faaaogaina e faaaoga ai lea fanua o le a le faaaogaina, aua o la e ua uma ona tanumia, e tele foi le tupe a le tatou faalapotopototoga ua alu ai i le tanuina o lea foi fanua. Ae o se fanua taua foi ma e lelei, e tu taulaga, ma e foliga mai foi o lea lava e talatala atu lava i tua le taulaga, ia masalo foi o se isi 5 tausaga po o se isi 10 tausaga, ua le foliga i togatogo a ua taulaga uma le mea atoa lea aua o lo o faataputupulaia pea tulaga o le manaomia o fanua i totonu o le taulaga.

E faaiu atu ai la se tala faapea lau Afioga, aua o lea ua taua e i ai mea o plans fou ia o le maketi. Ia o lea o le a toe sifi nei la i o i le mea lea o lo o i ai le maketi i le taimi nei, ia po o le maketi tuai, ia, aua o lea sa i ai foi le fuafuaga mo le isi foi fale e fausia i ina. Ia po o le a se fuafuaga a le tatou Malo i le fale fogafalelima lea sa fuafua e fauina i ina, po o faataatia foi lena polokalame po o le a se tulaga o i ai. E fia malamalama ai lou sui usufono.

Sa e saunoa faapea o le tauvaga maketi, pe a faapea o le SLC ea e i ai le isi maketi a o le ACC e i ai le isi maketi. Ia e manaia foi mea o faiga faatauva foi lele e lelei foi lele e faamalosia ai le faaleleiina o maketi. Ae afai e alu alu lava ua le iloa po o le a le tulaga e i ai aua o lea foi e manao lava le SLC ia e faaaauu o la e maua ai latou tupe, e manao foi le ACC ia e faaaauu o la foi e maua ai latou seleni. Ia aua o lea e matau atu e pei o lea ua ae mai le mea foi lele o le faatu authorities, po o le a le mea e le fai ai se market authority e tuu uma i ai maketi ia e lua ona operate ai lea faatasi, po o le market authority.

Ia e pei o nai vaega ia. Faafetai mo le avanoa lau Afioga i le Fofoga Fetalai.

FOFOGA FETALAI: Faafetai o lea ua maua atu lou finagalo.

Afioga Hon Fiamē Naomi Mataafa: Lau Afioga i le Fofoga Fetalai...

FOFOGA FETALAI: Ia, tulai mai lau Afioga i le Palemia.

Afioga Hon Fiamē Naomi Mataafa: O le matau lava ma le totoa i le faasologa o le tatou Fono, ua maua foi le finagalo o lau Afioga i le faatinoga o felafolafoaiga, aemaise foi o le tali atu a le Malo i se auala e manino ai le felafolafoaiga.

Ae tau lava ona tuu atu i tafatafa o lau Afioga tatou Tulafono Tumau i le tulaga o le mea fia faasao ma le mea fia faamalamalama. Talu lava ona ou sui usufono, tasi lenei o Tulafono Tumau i lou taofi ma lou faaaloalo, e le i mafai lava ona faatino i le sao e tatau ona fai ai i le tulaga foi lea i le tulai mai o le sui usufono i le fia faasao po o le fia faamalamalama, e muamua agai mai i lau Afioga i lana mataupu ona fai ai lea o lau faaiuga po o talafeagai pe leai.

Ae ona o lea ua aumai le faatulagaina, e manaia foi ae tatou faataitai tasi ai faapea, ia o nai mea amata foi lea atonu e lelei foi le sosolo lelei ai o le fetufaai ae tau ina tuu atu i tafatafa o lau Afioga.

FOFOGA FETALAI: Ia faafetai, o lea ua faafofoga mai le...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, pe mafai lava ona... o lea ou te matauina, o le saunoaga a le Palemia, o le tuu avanoa. O lea foi la ua tuu mai le taimi e faamuta ai e fia pasi ai le tatou Tala o le Tupe. O lea ua uma ona fai le matou tonu, pe alu le po atoa nei ma taeao, ua nofo sauni le HRPP e tatou te talanoa se i uma le Tala o le Tupe. E leai la se mea e popole ai le Afioga i le Palemia, o lea ua uma ona aumai lana faamanuiaga e tuu avanoa mai i le Vaega nei.

FOFOGA FETALAI: Faafetai i lau Afioga i le Taitai o le Itu Agai. O lea lava e faamanatu mai e le Palemia a tatou Tulafono Tumau. Ae ona o le ava atu lava i le Maota, ae a tu loa le Nofoa i lona tulaga ia ona faigata lea o le tatou mataupu. A o le mea ia, o la e malamalama lava tatou faauilavea i le mea e fia faasao, ae ui mai i i. A ou faalogo atu lava e le fetui, ia e faapena. A o le ava atu lava leaga e faigata tele lo outou mamalu. Ae felagolagomai le tatou galuega. O le mea lea, ia tulai mai Peseta leaga o lea... o le a lau faauilavea Peseta, o se mea e fia faasao po o se mea e fia faamalamalama?

Afioga Peseta Vaifou Tevagaena: O se mea e fia faamalamalama lau Afioga ona o le mea sa mamafa i ai lau lauga i le aso ananafi, ma o se tulaga e taua tele.

FOFOGA FETALAI: E le manaomia le lauga foi lele e toe faa... na ona faamaite mai lava o le uiga o le faauilavea.

Afioga Peseta Vaifou Tevagaena: Faamalo faafetai. Ua saunoa foil au Afioga i le Minisita ona e lua lava vaega sa ou avatu ai le tuualalo i le aso ananafi. Ia, o le tulaga foi lea i le mataupu faafailautusi...

Afioga Hon Fiamē Naomi Mataafa: Lau Afioga i le Fofoga Fetalai, o le mea e fia faasao.

FOFOGA FETALAI: Ia se i tulai mai lau Afioga i le Palemia.

Afioga Hon Fiamē Naomi Mataafa: O le tulai mai o le sui usufono e fia faamalamalama, e le faamalamalama la i lona taofi, ae fesili mai i le Minisita e ana le saunoaga pe i ai se mea ua sese pe tatau ona faamalamalama. Ae le faapea o le toe faamalamalama mai o lana lauga na fai ananafi.

FOFOGA FETALAI: Ia, tulai mai lau Afioga i le Minisita o Galuega.

Tofa Hon Olo Fiti Afoa Vaai: Lau Afioga i le Fofoga Fetalai, se e faamalulu atu, ou te iloa lelei lava le mea la e fai mai, o le tosotoso o le tatou Fonotaga, ou te iloa lelei lava. Po o fea lava e migoigoi mai ai, ou te matua puea lelei atu le mea la e fai mai o. Alolofa ia, ua faaaaogagase le tatou Palemene ma le tatou... ae topetope tatou mea ae tatou malolo.

FOFOGA FETALAI: Tulai mai lau Afioga Peseta. Ia o lea ua e faafofoga mai o oe foi o le isi sui usufono matua, lagolago mai i le tatou galuega.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, se faamolemole, e tatou te faitau eseese. E i ai mataupu e lauga ai le Vaega nei ae le i maua mai o, o lea la e toe tulai atu e faamalamalama le uiga tonu. A o lea e... matou te le manao e toso se fonon, o lea matou te fesoasoani atu ia te outou ma le tou pitolaau. Oi o le a tatou omai tatou omai tatou fonon i lo outou manao ona toe feita lea i le matou tutu atu?

FOFOGA FETALAI: Ia, o lea ua maua le finagalo. Leai o lea e tau faanofo filemu le tatou Maota ina ia maua pea e i tatou le filemu. A ia... e le o se tulaga foi e faanatinati a ia manino ma tatou tumau i le tatou Tulafono Tumau. Ia outou alolofa foi i le tausiga a le Nofoa. O le mea lea ia tatou felagolagomai. E na ona faapai lava, o lena ua outou silafia e le tau tau atua. O lea ua malamalama lelei ua uma ona famau uma e le Minisita mea uma. Ma ia outou silafia, o le tali mulimuli lava o le Malo, e faaumiumi fua a o la ua faamau. A e o le tali mulimuli lava o lena, o le Malo. O le mea lea, Peseta, faapuupuu mai.

Afioga Peseta Vaifou Tevagaena: Faafetai i lau afioga, o le agaga foi lana sa taumafai atu ai i le amataga. Aepeitai ua tuu lava le avanoa e sausaunoa atoa ai le Minisita, i mataupu taitasi. Ae pei o nai mataupu ia lau Afioga, e taua tele na ou agai atu i ai ananafi. O le tulaga lea, o lea ua saunoa le Minisita i le Aperenetisi. Silafia foi e tasi lea vaega ou te lauga soo ai lava. E faafetai e manaia le tele o matata ia, lea e feagai nei ma alo ma fanau a le atunu, i le tatou aoga faa-Aperenetisi. E tatau ona toe sailiili i atunuu mamao, e aumai se tagata lelei, e aoaoina le tulaga lea tau safety, i totonu o galuega tetele. Aua a silasila lau afioga i le tele o le Matagaluega lea o le ACC, o lea e tele ina faaalu i le totogiina o le soifua ma le ola o tagata faigaluega, ona e mafua mai i le faatamala o tagata faigaluega. Ia na ona ou faamaoto atu faapena.

O le mataupu mulimuli lau Afioga i le Fofoga Fetalai, sa malosi lava lou avatua o le tulaga lea e aumai le tatou vaalele. Ona o tulaga taua ia, a silasila foi lau Afioga. O le tele o tausaga sa luga lalo ai le Maota lenei, o tulaga lava ia faa-Itu Agai, latou te fesiligia ai lava lenei foi auaunaga. O tupe gau, o tupe gau. Aua nei galo i lau Afioga o le auaunaga lenei, e sea sea lava ona maua ai se polofiti. So o se kamupani vaalele lava i le

tele o atunuu o le lalolagi. E pei foi o Ausetalia, e faitau piliona ma piliona le gau lea e i ai. E le taua le gau e le taua le aitalafu, e taua le ola ma le soifua o le atunuu. O le e toatele o tatou tagata e fia auina atu i fafo mo togafitiga, aemaise foi o le feagai ai o le atunuu ma...

FOFOGA FETALAI: O lea ua ou maua le agaga o le faauilavea.

Tofa Hon LEATINUU WAYNE SOOIALO: Pe mafai ona aumai loa se avanoa e tali atu ai ia fesili.

Afioga Peseta Vaifou Tevagaena: E toe tasi lava le fesili ou nofo loa i lalo.

FOFOGA FETALAI: Onosai laititi mai lava lau afioga i le Minisita se i...

Tofa Hon LEATINUU WAYNE SOOIALO: E manatua mea ia, o mea fou mea ia, ua outou aumaia. E faamalulua atu ona o lou le tali atu i le tulaga lea na e fesili mai ai, ua misia ia au. Ae o le ua ou toe suesue atu nei au note, lea e tusi mai ai i i, fautuaga a Peseta. O lea e tusi i i, taatia mai, o lea la, taatia mai lau afioga, o lea o le a tilotilo i ai.

Lau Afioga i le Taitai o lona Itu, masalo o lau fautuaga o lea o le a talia i le taimi lenei. O lea e faalogologo atu le Palemia, i le va lea o le Palemia o Samoa ma le Palemia o le atunuu, o lo o aafia i le tulaga lea i quota po o le 110 lea e ave i fafo. O lea ua faafofoga atu le Matagaluega, ia Lemalu ma Pulu a o lua faafofoga mai, faamau i lalo ia fautuaga a le toeaia, tatou tilotilo i ai, e aoga.

Lau Afioga Fonotoe, o lea ua...

Tofa Lealailepule Rimoni Aiafi: Lau afioga i le Fofoga Fetalai...

FOFOGA FETALAI: Se i faauma mai nai mea ia ona...

Tofa Lealailepule Rimoni Aiafi: O le a ou onosai atu lau afioga.

Tofa Hon LEATINUU WAYNE SOOIALO: Ia faafetai mo fautuaga fou. Ae taatia mai, masalo o lea o le a iloilo i ai au nei ma le Matagaluega. Ae o le manaia ia o manatu. Atonu e i ai se manatu o le Faigamalo i se taimi fau ai se mea lelei i ina. O lea foi e manaomia se fale o le UTOS, e pei uma lava o i ina e lelei, e fau ai. Ae se i tilotilo i ai le Palemia ma tulaga ia.

Lau Afioga i le Fofoga Fetalai, ona faauma atu lea o se tala i lenei aso.

FOFOGA FETALAI: Tulai mai Lealailepule, e taitasi outou minute.

Tofa Lealailepule Rimoni Aiafi: E taua le mataupu lea mai tua. E taua tele le mea lea sa faapea e te tali mai ai o le Daylight saving. E le faigofie

le mataupu lea lau afioga o lena e te silafia. E le pulea e le matou Itu le tulaga o i ai le finagalo o le Malo, e le faigofie le mea lea. E le mafai ona fai i se tasi se vaiaso pe tasi se masina, e fetuutuunai ai, e le talafeagai.

Tofa Hon LEATINUU WAYNE SOOIALO: Ua misi ia te au, o lea e pito lava i lalo o le pepa. Le Daylight Saving, ua faamauina finagalo sa faaalua. O le a toe silasila totoa i ai mo le agai i luga. Faafetai lava, o le tali lena i le Daylight saving lau afioga.

FOFOGA FETALAI: Tulai mai Leaana ma Sulamanaia. Toe toalua tatou sui usufono ia, faauma loa, lau afioga i le Minisita.

Afioga Leaana Ronnie Posini: Ia faafetai tele au Afioga i le Fofoga Fetalai, ua maua so matou avanoa. O mataupu sa laga i lau foi lauga. O le mataupu lava lea i le tatou vaalele. O lea sa maua lelei i faamaumauga le taumafai atu lau afioga i le Minisita, le taumafaiga e aumai lo tatou vaalele.

Tofa Hon LEATINUU WAYNE SOOIALO: Lau Afioga i le Fofoga Fetalai, ua uma ona ou tali atu i le vaega lea. O la ua aumai fautuaga i le komiti. O lea e faatalitali le iuga o le komiti, ae a i ai sou finagalo e fia faaalua, ona tusi mai lea o se tusi e ave i le komiti, ia ona ave lea o se fautuaga lelei, e iloilo manu o lea e totoe le fonu e tasi, ae le i faia se faaiuga.

Afioga Leaana Ronnie Posini: Lau afioga i le Fofoga Fetalai, leaga o lea sa saunoa le afioga i le Minisita e i ai le sui lea na avatu lona manatu i le tatou vaalele. Ae fai mai, e tusa a pe gau. A o au tonu lava lea na lauga i le mataupu lea.

E fia faamalamalama i lau afioga i le Fofoga Fetalai, pe o le mafaufauga lea na avatu i lau afioga i le Minisita. E faatepa lava lau afioga, i le taaloga lea o le All Blacks lea na aumai e le tatou Iuni Lakapi mai i Samoa.

FOFOGA FETALAI: E faamalulu atu i le sui usufono, a fai a tatou taaloga, o lea e manaomia vave le...

Tofa Hon LEATINUU WAYNE SOOIALO: O le measili lea ua maua atu le finagalo o le sui usufono.

FOFOGA FETALAI: O lea ua maua mai e le Minisita lou finagalo.

Tofa Hon LEATINUU WAYNE SOOIALO: E faamalulu atu, e le o se taalofa le mea lea tatou te o ai, o le taumafaiga e aumai lo tatou vaalele, i se alagatau, i se tulaga talafeagai ma se tulaga lelei. Ou te le iloa o e e ona le tulaga lea. Ae faafetai tele lava i lou taumafai mai, o lea ua faamauina foi i i, e ave i le komiti. Ma le faaloalo lava.

Afioga Leaana Ronnie Posini: Lau Afioga i le Fofoga Fetalai,

FOFOGA FETALAI: Ua uma ou avanoa lau afioga i le sui mamalu.

Afioga Leaana Ronnie Posini: Lau Afioga, e pei e le o maua mai e le Minisita, ua vave tali le Minisita ae le o maua le autu o le mea lea na saunoa mai ai le Minisita ia te au e gau le vaalele, aua o au lea sa i ai le tuuaiga lea. a o lea ou t e fai atu, o le me lea na avatu atoa i ai lau faamatalaga, o le manuia lautele o le atunuu. E pei foi o le tatou lakapi lea na fai ai le All Blacks, na gau le Iuni lakapi a Samoa, a o le tamaoaiga i faletalimalo, faleaiga, aufai rental cars, mea uma lava na, lea sa tamaoaiga ai lo tatou atunuu.

FOFOGA FETALAI: O lea ua maua lou finagalo, ua faamau foi e le Afioga i le Minisita.

Tulai mai Sulamanaia faapuupuu mai...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, ou te tulai atu o lou faafetai i le uso, o le uso nei foi ua avea ma Minisita sa matou tulai atu, vaai foi i talatua. E toe lava o maua ma Leaana ua masani i le Itu Agai. Ae faafetai o le tulaga lea o fanua ia, silafia foi e le Fofoga Fetalai, e tulai foi talu ai sa ou naunau lava i le tulaga lea i le 35, ina ia mafai ona faapau i lalo i le \$8,000. O lea ua saunoa le Minisita, ae pei o le agaga lena o lea e tau fesoasoani atu ai. O le \$8,000 lea na aveese mai ai e le Usetete i lalo o le Samoa Land, o lea na faatau ai e nisi o le mamalu o le atunuu, ia fanua i o, e tau o le Freehold Land. O lea sa naunau lava lena sui usufono, ina ia mafai ona maua pea le faamanuiga lea. E leaga e faatau i le \$35,000 ae aumai ua fanua faaleaganuu.

E pei o le naunautaiga lena o lou nei sui usufono ina ua tulai mai. Ae leai se mea o i ai, o le a onosai pea, ona o lena itumalo o Vailele ma Fagalii ma Letogo, e pei o tuamaota ia e tua i ai. A o lea ua maua i lau saunoaga, e fai aso pea. E avatu pea le talosaga a lena itumalo, se i alofagia ia tau o matou fanua, ina ia mafai ona.... Ia manuia lou tulai mai.

Tofa Hon LEATINUU WAYNE SOOIALO: Ia faafetai uso mo lou taumafai mai.

FOFOGA FETALAI: Tulai mai le sui mamalu mo Satupaitea. Ma faauma mai loa le tali a le Minisita.

Afioga Hon Lautafi Fio Selafi Purcell: E faafetai i lau Afioga mo le avanoa.

FOFOGA FETALAI: O le vaalele foi po o se isi mea.

Afioga Hon Lautafi Fio Selafi Purcell. E leaga o le Matagaluega lea ua oo i ai si ou uso lea, e fai lava si tele. O lea ua ou vaai atu, e pei o le a le lava le toovae a si ou uso a Minisita. A o le taimi o ou i ai i o, e toa lava Satupaitea, e le taitai soona gaoioi le Minisita. A o si au fesoasoani atu i le afioga i le Minisita, e toe lua lava nai mea laiti ia, e toeitiiti lava a ou oo i ai, ae outou o atu loa, aveese matou ma o matou ofisa.

O le mea muamua, se i tilotilo ane lava, ona e iloa e le Matagaluega, ia se isi avanoa le tatou tala o le tupe. E toe i ai se isi liaison officer, mo Ausetalia. E tilotilo i le taimi lenei i le alu atu o tagata RSE i Ausetalai, a o Ausetalia o se nuu tele tele, e le taitai mafai e si tama la e i ai o Aufai, ona cover areas uma nei e i ai o tatou tagata. E i ai la o tatou tagata, e ono misi ai i ina le fesoasoani lea. E aoga tele le vaega lea, ae ono misi le avanoa lea, o nai isi tagata, ona e le mafai ona cover e le tama lea, Ausetalia atoa.

E sau mai lava i o i Victoria, alu i Berth alu i North territories, sau i Brisbane, o lona lava tou te silafia le tele. Ae na ona tuu atu i ina, manu lea e talanoa le Tala o le tupe.

O le isi mea lea lau afioga, o lea foi toeitiiti lava a oo i ai, o lona foi e silafia e le Matagaluega, toe renegotiate lava ma Ausetalia. E i ai le latou regional representative lenei i nei, se i tau tuutuu i lalo a latou requirements lea ua aumai, e manao ai i tagata e feololo le igilisi. O le toatele o tatou tagata e le gafatia. O lona uiga e miss out lava latou. O le mea lenei ua oo i ai lau faatonuga i le Matagaluega, avatu le teine lenei se i fai se ma talanoaga. Ia ua le oo i ai. Ae tuu atu pea i ou autafa, e tatau ona tuutuu i lalo a latou requirement ia ua te i ua sii i luga, ona ua latou iloa, o latou lea ua tele avanoa la ua maua ai. O Niu Sila la ua pau i lalo ona ua i ai le gap. A o Ausetalia, it will continue to grow, e toatele lava nai o tatou tagata e le o maua lenei avanoa.

Tofa Hon LEATINUU WAYNE SOOIALO: O lea ua maua atu le finagalo o le afioga i le sui usufono. E faafetai tele lava mo le fesoasoani mai. Ou te talitonu o lea faatoa 6 vaiaso o i ai i lea faamoemoe. Ae a i ai se taimi, ona ta feiloai lea ma aumai uma ai lea o fautuaga e fesoasoani ai ia te au, aua la... a e manao foi ou te alu atu ona ou alu atu lea. Pe e te fia afio atu foi. O lo o lava lava le toovae a lau afioga i le sui usufono.

O lea ua toe faapooa finagalo, a o lenei sa taumafai atu lava i le tulaga na i ai.

Ae malie lau Afioga i le Fofoga Fetalai, ua ou fia lauga lava i lo matou itumalo.

FOFOGA FETALAI: Ia o lea o le a uma.

Afioga Hon Lautafi Fio Selafi Purcell. O lo o lava lava le taimi, taitai...

FOFOGA FETALAI: O lea ua taunuu lou finagalo lau afioga i le sui mamalu mai Satupaitea. A i ai nisi fautuaga o totoe, e lelei lava le lua feiloai ma le Minisita i le Ofisa.

Tulai maia lau afioga Peseta ma faauma mai.

Tofa Hon Lauofo Fonotoe Nuafesili Pierre Lauofo: E leai e tasi lava le minute faamolemole pe le atoa foi.

Ona o lea sa saunoa le Minisita i se mataupu sa ou laga. O le mataupu foi lea o le CODEX. Ae faafetai i lau Afioga i le Minisita, ona o lea e matau atu o lena e te naunau i sau saunoaga i le itumalo. A o lea o le a faapepa ona momoli atu lea i lou ofisa ae faafetai mo le avanoa.

Tofa Hon LEATINUU WAYNE SOOIALO: E faafetai tele lava i lau afioga i le fofoga Fetalai, faafetai tele i lena Itu mo fautauga e ese ma le taua. E le faapea ua tatou faapea, ona le talia ai lea o fautuaga ua uma ona aumai. O le a faamau uma lava i i, o lea foi e faalogologo mai le Matagaluega e aafia i le tulaga lenei.

A o lenei itula, e ao ona ou oo atu i le matou itumalo, Faleata 2. E ese ma le taua o outou finagalo ua uma ona faaalua.

Tulouna le malae i Vaitagutu, o le malae o le aava o le malae e tauafanoa ai Faleata. O le malae e susu ai Siliga ma Umu sa Siliga. E polapui ai foi Nuu ma Leatinuu. A o lena foi e faatulouna le malae i Fogavaiusu, i le mea o lo o afio ai le Seiuli o le alo o Malietoa. Le Falefiaoalii, e puipui foi e le aiga Sa Ulugia.

E le gata i lea o si o matou nuu i Vaigaga. Le susuga i le Faafeagaiga le faifeau toaina le susuga ia Tautua Aulelio ma le faletua. Susu le susuga i le Papalii, faapena foi si ou aiga i Laloaoa i Vaigaga i le mea o lo o i ai Sooialo, Puaalatamai ma Puaasegisegi aemaise le Lautinalaulelei, i nuu e 12 o le matou itumalo o Faleata 2.

Faafetai tele mo la outou faaloalo, faafetai i lo outou manatu mai i le sui usufono lenei. O lea ua alu le term lona 2, po o le Paeaiga lona 2, o lo o tumau pea lo outou faatuatua i ate au e avea ma sui o lo tatou itumalo.

E faafetai tele mo mea uma, i ou aiga. I ou aiga i Samoa nei aemaise ou aiga i fafo, i atunuu e mamao. Faafetai mo la outou lagolago e le gata i le tuualalo, aemaise foi o le fesoasoani tau seleni sa fesoasoani, mai ai i lenei faamoemoe. E le faagaloina foi ia te au e o lo o fesoasoani mai i atunuu mamao FAST supporter groups, i Ausetalia, Niu Sila ma Amerika ma Hawaii ma Tutuila, i latou ia o lo o lagolago mo le faamoemoe a le Vaega Faaupufai.

E le gata foi i lea, o lo o i ai foi i latou i saofaga a itumalo e 51, o lo o fesoasoani mai lava i le taumafaiga a le tatou Vaega Faaupufai. E fesoasoani mai lava aua pili o tatou loia. E le mafai ona faagaloina lo outou agalelei, aemaise lava o si ou toalua i Vaigaga, Vaotupu ma le fanau. O lenei ua tau sini o le faamoemoe. E pau lava le mea e tatalo atu i si o tatou nuu o Vaiusu, o lo o i ai lo tatou faafitauli o lo o i ai i le taimi lenei. Ae talitonu tatou te feiloai i le aso Toonai o i luma, fai se tatou tala. Aua le faamoemoe ua mafai ona taatia mai. O lea ua ia te au le faipule o

lo tatou itumalo. Ua faamalo atu foi i lo matou nuu o Vaigaga le onosai. O lea ua ou tau, o lea e avanoa lava lo tatou faleaoga e toe faatino. O lea foi ua maua le tatalo i le Minisita o Aoga ma le Minisita o tupe ina ia alofa mai. Ina ia mafai ona faaauauina le faleaoga o le matou nuu sa taofia.

A o lenei taimi, faafetai tele, faafetai i lau afioga i le Palemia ona o lau tofiga ua aumai ia te au, ina ia mafai ona ou taitaina ai lenei Matagaluega tele.

E faapena foi i lena itu, le fesoasoani foi i lau Afioga i le susuga i le Tuilaepa, aemaise foi... e eseese foi manatu, ae talitonu o lo o talia lava fautuaga, ona e faalogologo foi ia oe le tama i tulaga ua tulai mai.

Aemaise Lautafi, mo le galuega tele sa fita i ina.

A o le faafetai faapitoa, e faafetai atu ia Faimalotoa, e pau lava lea o le tina na e saofai mai i ina i lena itu e toa lona loto. Ma e lelei foi ana fautuaga, ai o le mea lea ua le omai ai le isi autamaitai lea e vevesi i ina. Ae tofia mai lava na o Faimalotoa, aua e sao lava lona finagalo.

O lea e momoli atu ai, le faafetai tele i lau Afioga i le Fofoga Fetalai, ia manuia lava fuafuaga o totoe i lenei vaega o le aso. Ma le faaaloalo lava.

Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Minisita mo Pisinisi, Alamanuia ma Leipa.

Afioga Hon Faimalotoa Kika Stowers Ah Kau: Lau Afioga i le Fofoga Fetalai, sa leai se agaga e tulai atu, ae o lea ua tau lo ta igoa. E leai faamolemole ou te tulai atu e puipui lenei itupa vaivai o le itupa o tina.

O nai o matou sui ia ua taua nei i le saunoaga a le Minisita. Ona e silafia lelei, o i le sui lea, lea na amata ai le vevesi ma tele mea ia na fetauai nei. O luga i la outou finau ina ua outou masalomia le faamaoni o le galuega a le CEO, le Komesina. O i ina lea na mafua mai ai i tulaga tau faamasinoga i le sui o Falealupo... O le tulaga lea, ou te le taitai ona ou faatautee i lau afioga. Ae ou te puipui i sui o tina la e faafofoga mai tina ma tamaitai o Samoa. Ona na taofi foi au, ae ua maua ai la le avanoa, ona o la ua leva ona fai mai. E te tu i luga ma faaleo o matou...lea la ua toe aumai e le Minisita le avanoa ou te tu atu ai. O le talosaga a tina ma tamaitai o lena itu, i lo tatou Malo aemaise lau Afioga i le Palemia, le tamaitai ua tulai mai i le foe. Faamolemole, amanaia tina ma tamaitai o Samoa o lo o tele lona sao, i le atinae o le tamaoiga o si o tatou atunuu. Ne i faapea ua ou solifono, ae o lena ua avatu se manaoga. Faamolemole, e taua tina ma tamaitai.

O matou sui e pei ona taua e le Minisita, na tou te silafia le vevesi ona o sui ia. Ma lou faaaloalo.

Tofa Hon Leatinuu Wayne Soialo: Faimalotoa faafetai lava.

FOFOGA FETALAI: O lea ua maua lou finagalo, o lea foi ua faafogafoga mai le Minisita, o lea foi ua toe faafoi mai le saunoaga. Ae tatou o i mea mamalu. E faamalulu atu i le sui mamalu aemaise foi o le itupa o tina ua taua. E leai o sala lava o upu o lauga, ae o le agaga ia e le o le tulaga lena. O lea ua faamalulu mai le Afioga i le Minisita, tatou agai i luma. O le mea e sili ona taua, e faamoemoe pea i le Atua e fesoasoani mai i lo tatou vaivai.

O le mea lea, o lea ua oo mai le tatou...

Afioga Fuaava Suluimalo Amataga: Lau Afioga e i ai lava si mea laititi lea e fia faasao faamolemole.

FOFOGA FETALAI: O le a le mataupu.

Afioga Fuaava Suluimalo Amataga: O le saunoaga a le Minisita Ona o lea e taua ai tulaga mo faamaumauga a si vaega lea i tua. Leaga o lea e taua Aleipata Itupa i lalo, ae le o i ai se sui. I te i ua faapea si ou itumalo, ai o ou toe eva foi. Ae mo le faasaoga lava o faamaumauga ma le faaaloalo.

FOFOGA FETALAI: Ua lelei, o lea ua maua le finagalo o le sui mamalu. O le a faapena ona fai.

Faafetai i lau Afioga le Minisita o Leipa ma Fefaatauaiga, faafetai mo le folasaga. O lea foi sa taumafai atu i le fuafuaga foi lele, ina ia faigofie ai le tatou galuega. E le o i ai se manatu o le Nofoa a mea e tu i le tulaga e i ai a tatou tulafono. Ae o le manatu atu ma le ava atu.

Ae i ai le manatu tatou felagolagomai lo tatou Maota. Ia outou alolofa foi i le tatou galuega o lo o tau tulituliloa lo tatou galuega.

Ae i ai le manatu, o le a tatou felagolagomai ma sologa filemu le tatou galuega o le afiafi.

Ua oo mai le taimi o le afioga i le Minisita o le Soifua Maloloina.

Tofa Lealailepule Rimoni Aiafi: E i ai lava si mea laititi lea. Lau Afioga e leai ma se isi o lenei itu na tetee i le Tala o le tupe. E leai la se popole faapea i te i ua le pasia.

O lea foi na logosaia lava lau afioga ina ua e saunoa mai, e tuu le avanoa i Afioga i Minisita ae matou faatali. O lea ua usitaia lau afioga.

E talu ona amata mai i le Afioga i le Palemia, oo mai ia Laauli, leai ma sau faalavelave aua.... tala ai.

A o lea ua ou faanoanoa ua saunoa mai le Afioga i le Minisita, e faamau i le pito lava i lalo. Ae pau lava lea, tali mai o le a fai pe leai, e malie ai lou loto, ona ou le tu atu lea.

Ae mo faamaumauga leaga o lena e pei e le amanaia matou tala, faapea na aumai loa le tala a Leala, lea e tuu ai loa i le pito i lalo, e leai se mafaufau i ai. E leai e le faapena le faia o mea lau afioga.

FOFOGA FETALAI: Ia lafo mai, o lea ua saunua le Minisita, tatou ona faapena ona fai. O la ua i ai le faamoemoe o le Minisita e tali atu i le sui mamalu. Ae le o se le amanaia, e faamalulu atu ai.

O le taimi lenei ua tatou oo mai i le Minisita o le Soifua Maloloina.

Lau Afioga Valasi. Tulai maia, o le manino lava lau afioga i le Minisita, faailoa mai suafa o sui mamalu na laga mataupu, e faigofie ai foi la tatou galuega ma le faaaloalo.

Afioga Hon VALASI LUAPITOFANUA TOOGAMAGA TAFITO SELESELE (Minisita mo le Soifua Maloloina): Lau Afioga i le Fofoga Fetalai, ua leva ona ou faatali i lou taimi. O le mea moni lau Afioga, i le faaaloalo ma le migao e tatau ai, o le Fonousu a Samoa ma le matau, e i ai le upu a le atunuu e fai i le faiva o le gataifale. “A lele le igafu ua lupepe le taumanuula. E le soona alei se vaa e fai gofie.” E leaga ou te talitonu, o le Maota lenei, e le fai faiva laalaa ai se tasi lau afioga.

O le mea muamua lau afioga i le Fofoga Fetalai, e tasi lenei Matagaluega, a oo ina lauga le Minisita, e 2 aso e tautala ai pe 3. E leaga o lo o i ai lava le avanoa e tatau ona tolaulau uma manatu, aemaise mea o lo o fia malamalama ai sui mamalu.

Ae ui i lea, e leai se talitonuga e i ai ni mea e faanunumi.

Ae amata sau tala e faapea. O lou fiafia ia ina ua ou toe maua maia le Taitai o le Itu Agai. A ou tilotilo i le pito le la, e na o Tuilaepa lava se i tulou, ma Niko Lee Hang, aemaise le sui Taitai, ma si ou uso ia Tuuu. O tama matu ia. Sa matou feagai i lena vaiata. Sa ou maua mai le faatautaiga a Tofilau. O i i le taimi lea i le 1996 i le 2000, le 2001 i le 2006. O le tele ia o lau aoga na maua mai ai. Ina ua ou saofai i le Itu Agai. O se tasi o toa manumanu i le polokiki. A o faafofoga mai Tuiatua Tupua Tamasese. Sa ou i ai i lana taitaiga.

O le ala foi lea o lou lagolago lava ma lou talitonuina o fautuaga a le tama ia Tuilaepa po o le Taitai o le Itu Agai. E leaga sa ia faafesagai ma ia faafetauia le taimi o le vevela o le polokiki. Le taimi na malosi ai le Itu Agai a Tuiatua ma matou, ma le Afioga i le tootoalii. O le ala lea, sa nofonofo lava ma matau.

O aso ia, e leai ni mea faapea e tutupu. E tautala loa le Taitai o le Itu Agai pe saunua, e faaaloalo lava matou, leaga o la e momoli mai e le Taitai le tofa. A o lea ou te vaai, ia e leai se tio, o le agaga o lenei aso ma le Fono, ia faafetai.

E momoli lau faafetai Tuilaepa, faafetai tele i lou sao taua, e le faailoga fesili i lou lava sui usufono. O le tiute ma le faiva, le fiasefulu tausaga, o oe o le taitai pito i lea o le Pasefika. E mafua i se a? O galuega lelei. E ui lava ina tatou fetuleiaiga i polokiki ma tatou upu felafai. Ae a iloilo lava, e fiu lava e nana le moa e ioio lava. E fiu tatou te tanu galuega lelei sa o tatou faia.

Lau Afioga i le Fofoga Fetalai, o lo o faafofoga Samoa i lenei Fono, e momoli le agaga faafetai. E fai mai le mau a lou itumalo. Na alu ane le tamaitai po o le tausala i le malae e toso ane le fala. Ua tuu i ai le tootoo

ma le fue, fesili lea o toeaia. O le a siaula lena mea? Fai mai le tamaitai, o lo o saili se lauga o le malae.

O le ala lea, Vaisigano Nu 2, o lau filifiliga sa saili se lauga o le Maota leni. E tasi le filiga i lau sailiga, o Valasi Luapitofanua Toogamaga Tafito Selesele, o lea toe foi i le Maota o Samoa.

Lau Afioga i le Fofoga Fetalai, sa fai lau miti, ma sa ou miti. Sa ou talatalanoa i ma faasua ma le Afioga ia Tuilaepa, ina ua fai le tatou ti taumafa. Ona ou fai atu lea i le afioga ia Tuilaepa, na ou miti ou te toe fia foi mai i le Maota. A lea ua taunuu le miti. O le ala lea lou itumalo Vaisigano 2. E le tau faalagiina ou paia ma ou mamalu o mamalu e tumau i ou malae e fia i Paepae ma Fanualii ma Faupapa e puipuia e Aiga o Mavaega, o Aiga e tofi e Tupu, e puipui e Sataua ma Lealuga. Ae le gata i lea o Paepae e puipui e le afio o Luapitofanua ma Ufagalilo, le Maopu ia Toleafoa aemaise Taloa o le alii o le nuu. E a le lua toalua Utuutu ma Faitau, Aumua ma Maninoa. O ou paia atoatoa na.

I le 1996 agai i le 2000, 2001 agai i le 2006, sa logologo le lauga a Vaisigano i le Maota leni. E silafia e le Afioga i le Taitai. Ae faafetai i lou itumalo i la outou faaea, e 45 tausaga i le talafaasolopito o le ta itumalo, leai se Minisita. E le gata i le tofi Minisita le Afioga ia Tapulesatele Rapi Vaai, sa Minisita o Galuega, toe Minisita o Elele. 45 tausaga. Ae a leni vaitau? O lea ua tofia leni faatauva e le Afioga i le Sao Faapito, malo pule faafetai le faaea. E ui ina faatauva le tagata, ae ou te talitonu o le Atua le faasinomaga.

Fai mai le mau a le tusi a Sakaria, o le faaaliga na tau i ai e le agelu. O Sakaria o le tasi perofeta lea i le taimi ua toe ae le tafeaga a Isaraelu, le taimi lea na toe atinae ai le malumalu i Ierusalem. O le tagata sa na faatinoina ma taitaia le faiga o le galuega, o le tagata e suafa ia Serupapelu. Na vaai lea o Sakaria i le faaaliga a le agelu, fai mai le agelu, “Sakaria, tau ia Serupapelu, e le o le fitafita, e le o le malosi, a o le agaga o le Atua.”

Lau Afioga i le Fofoga Fetalai ma le mamalu o le Maota, o le agaga lena o le sui usufono leni, e le o le fitafita, e le o le malosi a o le agaga o le Atua.”

A le i faia le lauga a le Minisita o le Soifua Maloloina, o lea ua ou faapai i lou itumalo, ou te tapatapa i lau Sui Minisita lau Susuga Tea, leaga o lea o le a sii lo ta vaa i tai, lau afioga i le CEO po o le Ofisa Sili o Pulega lau Susuga Leausa, lau susuga Mulipola o lo o faauluulu i ai le Matagaluega o lo o faamamaina toto o le atunuu, se i tulou, aemaise lau Afioga ia Toleafoa Manufalealili Dr. Viali, tapuai maia. O le a sii le vai i tai o le ta Matagaluega.

Ona ou faapea lea, lau Afioga i le Fofoga Fetalai, leitioa saasaa Malietoa i ao o nuu taliola, aua e talitonu le taofi o Samoa o le atunuu ua uma ona tofi. O le Maota ua soo ona taiao, o le sami e le soona fagotalia e se tautai, e leai lava se isi e utuvai tofo i ai. Le paia o Samoa, e pei ona ou fai atu, e tumau e faavavau, e leai lava se vave na te pulufuaina le oloagiga e leai se poto e na te foua le apulutamuliauma leaga o Samoa o le i'a ivi lililo, e auagata, e faigata foi ona faiva. E i ai le talitonuga ia

ee ia i toaga mafana, taoto faagalu e le fati ma ufiufi faafaleseu o tupu paia ia. Ona ou faapea lea, le paia e o Samoa ou te le toe tau fai atu, i ou paia faale-Malo, paia faale-Talalelei, paia faale-aganuu, e pei ona ou fai atu, e leai lava se vave, o lea ua tititonoa po ua ao i le Maota nei i Tiafau. Ona faapea lea, lau Afioga i le Fofoga Fetalai, taoto laia paia leaga ua uma ona faalagi e le gata i sasae ma sisifo, a o Samoa aoao.

Le afaigaluega paia a le Atua, faafetai tele i le nofo tatalo, e i ai se taimi ona toe afe atu lea i ai.

O le faasaoina o le taimi lau Afioga i le Fofoga Fetalai, e le i nofononofo le Minisita o le Soifua Maloloina ma lana CEO, sa tusitusi ma ta lelei i lalo tali e tatau ona tali atu ai, leaga o le mea lea sa e faatonuina.

Ae se i fai lava lau tala lea ae le i taliina manaoga e faavae ai se manatu. Fai mai e i ai le toeaina ma si ona atalii ma si a la solofanua. E savavali ane le toeaina ma le atalii ma le solofanua ae toe tagata. Fai mai, “Sole, matua valea le la toeaina, o le solofanua e tatau ona tietie ai a o lea e savali.” Ona oso lea o le toeaina i luga ua tietie ae savali lona atalii. Toe tagata ina ua taunuu atu i lea vaiaai. Sole, e ofo i le toeaina i le faasavali o lenei tamaitiiti o le alualutoto ae tietie i le solofanua. Ia ona tago lea o le toeaina ua avatu lona atalii la te tietie faatasi. E o atu foi i le isi vaiaai ae toe, sole, o le a pe le solofanua, e ofo i le mamafa o le toeaina ma lona atalii, a o lea ua vaai atu i le solofanua ua tigaina. O le mea na tupu le Maota, vaeatu lau Afioga i le Fofoga Fetalai, na iu lava ina taumafai le toeaina ma lona atalii e amo le solofanua.

O le uiga o lau faamatalaga lau Afioga i le Fofoga Fetalai, tasi lenei Matagaluega e tele i ai tala a Samoa. O le tatou tofi sui usufono foi, tatou te fiu e fai mea lelei, e faitio lava. E te fiu e fai mea lelei, e faitio lava. O le talitonuga, e ese le maoae o galuega a le Matagaluega. Le afaigaluega, faafetai tele. Le CEO ma ACEO ma so o se vaega, e oo lava i sikulati, avetaavale ma le au fulu fale se i tulou, e leai lava se isi e leai se sao taua.

Lau Afioga i le Fofoga Fetalai, o ia mea uma lava, po o a mea lelei e fai, e o atu loa le tagata ua misi le fualaaui e tasi ua le maua, fai mai ua sioki. E o atu loa tagata ua faaletonu le vaai a le fomai ua nofo i nai minute, fai mai ua faaletonu.

Lau Afioga i le Fofoga Fetalai, na o sina tamai taimi lava na ou vaai ai i le Matagaluega, a ua ou iloa lelei le mea o lo o tupu. E le tau aumaia ia te au se fia tausaga ou te saofai ai. Leaga o lau upu lea na fai i lau CEO, “Leausa, e le o au o se fomai, e leai foi sou poto faafomai, o au o le matai Samoa, tausai aiga, tausai nuu, fofu faafitauli i le avafatafata aemaise o le fetuunaiga o le tofa ma le faautaga. Ou te le i sau e fai ni au galuega pe fai ni galuega a fomai, leai. Na pau lava lou tiute, o le vaai ia sao ta faaiuga, aemaise foi le silasila i le Pulega ia manuia tagata.”

Lau Afioga i le Fofoga Fetalai, e ese le manaia o le matou fesootaiga. O mea uma o lo o tali atu ai ma fesili mai, ua manino le vaai leaga sa ou taamilo i tua ma lau CEO ma le Matagaluega. Tou te lauga mai la, ua leva ona foi mai sailiga i Savaii aemaise o Upolu. Ua manino lava tulaga uma.

Lau Afioga i le Fofoga Fetalai, e tele manaoga, ae tasi lea o Matagaluega ou te fai atu e oo lava i le tele o tagata ua fia ave mai i fafo, ua le masino. Ou te iloa o le mea lea sa feagai ma le taitai o le Malo i la vaitau, aemaise foi le Afioga ia Faimalo Kika. Se ou te faafetai Faimalo. O galuega sa e faia o lo o faaauau, e leai se mea e tasi, ni mea fou ou te suia. Afai sa faataoto e le faigamalo mea uma, pau lava le mea ia faatino ma ia lelei. O le tiute ma le faiva so o se tagata e sui sui mea, ou te talitonu e iu i le faaletonu. Ae pei ona ou fai atu, ua faafofoga le CEO ma le aufaigaluega, tea le 7 i le taeao e le tau faamalau atu, ou taamilo i le falemai. A ou alu atu o alu le paipa, ou fesili, e mafua i se a ona alu le paipa o le faleese po o le faleui? A ou alu atu o pe le ea, e mafua i se a? E pei lava ona ou fai atu ou te le alu e fai ni galuega, a o le vaai ma le tilotilo. O aoga ia sa ou maua i le Afioga lea ia Tuilaepa, sa ou faalogologo ma ou matau. Ia na pau lava le eseesega i lenei vaitau lau Afioga i le Taitai o le Itu Agai, maumau e pe a na faapea e omai loa le aualii ia amata mai le Itu Agai, se i faataitai i le mea e tau o le agaia o le Malo, ona sau ai lea faimalo, a. Ia a o le mea lea, na ona uma a faimalo ae o lea faatoa... e pei e tau le iloa agai le Malo. Ui o lea lau Afioga i le Taitai, e ese le matagofie o aoga i lenei vaitau.

Ou te manatua lau Afioga i le Taitai le taimi na e tatalaina ai lau Pati, le SNDP, e ese le matagofie. Sa ou tolotolo atu, sa e aloaia. Ou te manatua lau upu sa fai, pau lea o le Pati ua aloaia e le Palemia i lenei vaitau. Sa ou fai atu Tuilaepa, ou te manatua lelei au upu sa fai i le aso lea ua e aumaia le perofeta ia Ieremia, na tofi e le Atua a o i le manava o lona tina. Sa ou alu e ese le taua o lau feau, ma lau upu na ou musumusu ai, Tuilaepa, e le fesiligia le malosi o le HRPP, e le fesiligia le power. Ae o le a ou alu e saili ni sui tauva e faafetoaia le malosi o le HRPP. E ui lava la ina faapea e ese le auala sa ou faia, ou te talitonu o le auala mai le Atua, tuufaatasi ma le FAST, a lea ua malosi.

O le ala lea Tuilaepa, e to lou pulou i le taimi na ta feiloai ai, faapea le aualii ia ai e pepelo upu ia ou te fai atu, leaga o lau saunoaga sa e faamanuia mai. Ou te talitonu i lenei aso, ma le upu sa e faia i le aso, “Ae e te le i fanau mai ua filifili oe e le Atua.” O le ala lea o lou fai atu, e le o le malosi po o le fitafita, a o le agaga o le Atua.

O lau foi la oo mai...

FOFOGA FETALAI: Ua ou vaelupeina le saunoaga matagofie a lau Afioga i le Minisita mo le Soifua Maloloina, ia, ou te manatu ona o lea ua oo mai i le taimi o le tatou malologa, ae o le a faaauau lau saunoaga ma lau lauga mua i le Maota pe a tatou taliu mai i le tatou malologa.

Na o sina faasaoga lava o le tatou lafo lea na faatu nei e le Afioga i le Palemia, na o sina faasaoga laitiiti lava. O le a faaauau le tatou galuega seia maea ona tagofia galuega uma o lo o i le Pepa o Galuega o le aso Fono lenei ona faatoa tolopo ai lea o tatou taualumaga i le po a nanei. Ia o le faasaoga lenei o le tatou faasilasilaga a le Taitai o le Maota.

Ou te faasilasila atu o le a faataatiaese Galuega a le Fono Aoaofaitulafono mo lana malologa e 15 minute.

Na faataatiaese Taualumaga a le Fono Aoaofaitulafono mo lana malologa i le itula e 3:45 i le afiafi ma toe faaauau i le itula e 4:15 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofaitulafono.

Ia, faamalo le onosai i le paia o le tatou Palemene.

E faataatiaese tatou Taualumaga mo le sausaunoa le Afioga i le Minisita mo le Soifua Maloloina. Ia, ou te tapa ma le faaaloalo lau Afioga e te tulai mai e faaauau lau saunoaga.

Afioga Hon VALASI LUAPITOFANUA TOOGAMAGA TAFITO SELESELE: Faafetai i lau Afioga i le Fofoga Fetalai ua sao i alo le taliga o le sua i le tatou Maota nei, aemaise foi tulaga e pei ona i ai se faasiliga malosi. E momoli le agaga faafetai.

Lau Afioga i le Fofoga Fetalai, avea ia lenei avanoa o le a oo atu loa i mean a laga, o lo o faamaumau lelei, afai e misi atu, ua uma ona ta lelei le pepa e faasolo i ai le vaai a le Minisita. O le a faasolo atu i e na lauga muamua, le Susuga ia Vaele po o Gagaifomauga 2. O lea sa talanoa Vaele i ni faaletonu o le falemai i Tuasivi, aemaise foi tulaga e pei ona i ai foi lana silasila faa-sui usufono i tulaga e tataua ona faaleleia. E pei lava ona ou fai atu, o ia manaoga uma, e le i faua Roma i se aso se tasi. O lea ua vaavaai totoa i ai ma sa faagasolo asiasiga ma tulaga e pei ona i ai. E i ai lava nai mea e tataua ona ave i ai le faalelei ma le faamuamua, aemaise foi o lo o faaauauina pea tulaga e pei ona taoto mai.

I faamaumauga lau Afioga i le sui usufono e pei ona e taua le le lava o nofoa po o meafaigaluega, o lo o manino sa faasoa atu i tua le tai 18 moega mo gasegase, 2 wheel chairs, moega toso mai. Sa ou asiasi foi i le falemai lea e i uta i Avao e pei ona e taua, o le tala mai a le fomai, e seasea tele ni mai. Masalo a tele ni mai i le aso e vaai ai, o isi aso e tai-2 mai, o isi foi aso e le ato se 10. O faamaumauga uma na sa aumai ma tilotilo i ai. O le falemai lea i Avao, o se fale malosi tele. Ae i ai le fautuaga sa tuuina atu i nisi o le itumalo pei ona maua foi e le CEO ma au nei i le taimi sa asiasi atu i ai, foi lele sa tau popole ona o se agaga foi lea e vaai e mamao i uta. A o le talitonuga ua tulai mai i le vaitau leni o le Koviti-19, afai ae taunuu mai se Koviti-19 ia tatou, tasi lea nofoaga ua manaia tele mo le ave i ai o tatou gasegase faapea, aemaise uta e tapena lelei aemaise foi tulaga e pei ona i ai. Ia, tasi lea vaaimamao a le

Matagaluega i tulaga e pei ona i ai. A o le fale, e matua lelei atoatoa. Na pau lava le mea, e toaaga foi nai toeaia e teuteu ma vaai. Na pau lava le mea sa talosaga ane nai toeaia, lea foi e maua i le talosaga a le sui usufono o Avao, e i ai se taimi oo atu i ai, o le teuina foi lea o le malae po o le fanua aua o lo o i ai foi fuafuaga sa i ai, ina ia maua le seleni e i latou o lo o teuteuina, aemaise foi o tulaga e pei ona i ai le faamamaina.

O nisi o mea e pei ona vaavaai i ai, e i ai le manatu foi lea e tilotilo pea i ai, aua o lea e aumai lau mau e pei e aitua le fanua, se i tulou. Ia faapea e i ai ni tagata e ono le lelei le nonofo ai i uta ona o mea... ia, e iloagofie lava tagata e le lotu e talitonu i na mea o aitu aemaise foi afai e toaaga e faitau le Tusi Paia, e tele fefe i mea o faafitauli faapena. A o lau fautuaga i le sui usufono, o le tasi lea mea o lo o tilotilo pea i ai pe i ai se isi option e faaaoga i ai le fale lea i uta i tulaga e pei ona i ai. Aua e moni lava le vaai foi i ai, e fai si maouta o le fale e faigata ona uia e gasegase, a o i e tapena ai ma'i po o gasegase mo le falemai i Safotu, taofia foi lea i ina pe afai e moomia ma faaoo ai i Tuasivi.

Na ou taua nisi o mea e pei o taavale ave ma'i, ambulance, tasi lea faamanuiaga o lou oo mai, ma ou oo atu i le Matagaluega i mea sa tapena foi e le faigamalo ua uma. O lo o i ai fuafuaga, ma o lea ua taunuu mai tatou ambulance e 7, ambulance e 7. Ma o ambulance nei, e tataua ona i Savaii ma nuu i tua. Afai la o faafofoga mai falemai ia i nuu i tua ma Salafai, aua ne i toe fesili mai se isi ne i te i ua le faasoa i ai e le Minisita ma le CEO ia ambulance. I lau vaai, o Safotu, Foalalo, Satupaitea, ia, aua o Tuasivi, o Sataua la e ua i ai le ambulance. Lona uiga, o isi o Lalomanu pei ona tatalo mai foi le sui usufono o Lalomanu, aemaise tulaga e pei ona i ai. O folafolaga ia e fai atu o lea e fai i le Maota leni. O lona uiga, ua i ai tulaga faapena, aua le faapopoleina. O lona foi ua faafofoga mai. E ala ona tuai ona avatu i tua, o lo o tusi sign ma tapena lelei e le CEO ona tufatufa loa lea i tua. O lona uiga, o tulaga e pei ona i ai.

O nisi o mau e pei ona tuuina mai e le susuga ia Niuava, le sui usufono mo Vaisigano 1 i le le lava o fualaa. E le i leva nei ona faagaoioi le tulaga o le mea e tau o le amp supply. Sa masani ona okaina na o Tuasivi fualaa ma o i ai tatou centre nei i tua po o falemai i tua e oka mai ai fualaa. Mo le silafia e leni Maota, ua uma ona... lea ua introduce le mea lea, e omai lava le falemai ia e oka atu i le warehouse a tatou i Motootua ina ia lava supply. Aua ne i toe faatali se i oka e Tuasivi, leaga o le mea e tupu, e tele falemai. A o le mea lava ia, o la e lelei lava le faagasologa. E talosaga atu la afai o faafofoga mai tatou falemai, ua uma ona faatonu e au ma le CEO ia oka vai in advance, ia mafai, aua ne i sioki loa nei faatoa oka mai taeao. O faafofoga mai tatou falemai, lea sa asiasi atu ma fautua atu, lea ua faaaoga le faiga lea ina ia mafai ona tele ai le fualaa, aemaise ia lelei le... Ia lea la pei ona e faafesili lau Afioga i le sui usufono mo Vaisigano Nu.1, ia, o le tulaga lena o lo o i ai nisi o faafoia o nai faafitauli.

O lou fesiligia o le okesene, i le taimi nei toetiiti maea le fale okesene na fausia i lalo o le fesoasoani a Niu Sila, ma o mea foi sa faataoto mai o lea foi ua faaauau, o lea e fausia ai le fale e Niu Sila, ma o le latou foi

fesoasoani ina ia latou faia mea uma ma install le masini fou, le masini fou lea e utu ai mea o okesene. Leaga o le tatou fale okesene muamua sa faaletonu masini. O masini masalo pe 100 i le 200 fagu okesene e utu ai. O le taimi nei la, masalo po o le isi 4 i le 5 vaiaso ua mafai ona uma le tatou fale okesene, aua e omai lava le vaega a Niu Sila latou te faapipiina tulaga e pei ona i ai.

O le supply mo le taimi lenei, ua uma ona polokalame lelei e aumai e le vaaalalo tatou supplies, o a uma empties e maua i vaiaso uma i Tutuila ma aumai store i le tatou falemai ma faasoaso a tua. O le taimi nei la, e le o i ai se faafitauli i lea tulaga. E pei lava ona e faafofoga mai lau Afioga i le sui usufono, ia, e le alo le Minisita faapea e puupuu le taimi. A o le Minisita ia e galue ma taumafai e tilotilo i faafitauli, ia faaauau faiga, e i ai le fesuiaiga o mea a ia lava.

O le CT Scan e pei ona e taua. Ua uma ona ou sainia le konekarate, le tender mo le... ua uma foi ona pasia e le Kapeneta, aua sa i ai foi le faataotoga i le pepa a le Kapeneta talu ai i le faigamalo, lea foi la ua o atu foi latou, o le mea muamua lava lea sa finau, ia aumai le tatou CT Scan, aemaise ua pasia ai foi ma part o le CT Scan ia aumai faatasi ma le masini fou lea. O lea la ou te tautino atu, e le o toe mamao ae taunuu le tatou... O lo o i ai fetuunaiga i le aumaiga mai Ausetalia o mea uma ina ia mafai ona fesoasoani i le tatou atunuu i tulaga e pei ona faamalieina lea foi vaega.

O Palauli, ia, o lea ua aumai foi lou finagalo, aua o Palauli e agai i Satupaitea, ua uma ona asiasi Satupaitea i lou falemai, o faafofoga mai foi le susuga i le sui usufono o Satupaitea sa na amataina le galuega ma fausia lea fale i le tulaga e pei ona i ai. Tasi lea falemai lelei o lo o ua maopoopo le tele o mea. Na pau lava le mea o se taavale ave gasegase ma se fale o fomai. A outou silasila i le Tala o le Tupe, o lena ua maioio atu tulaga o seleni e fausia ai tulaga faapena i nuu i tua. O mea foi sa faataoto mai aemaise foi tulaga e pei ona i ai le faaauauina. Masalo i le asiasiga talu ai i Savaii, o le falemai i Sataua, falemai i Satupaitea, aua o falemai na e tausavali mai le fomai, o lo o tologi lava tulaga o lana nofo i se hotel po o se mea e faamautu ai ina ia... o lea foi la ua taumafai le taumafaiga i lenei vaitau ina ia fausia. Aua o fomai, e moomia o latou aiga. O le isi fomai ia e faigata ona alu atu e nofo i Savaii i le masina ae tausavali mai e vaai le toalua ma le fanau. I le talitonuga la, e tatau lava ona fausia fale nei i tulaga e pei ona i ai. Ua uma foi ona faamaioio e pei foi o Lalomanu. E pei lava ona fai atu, ua uma ona asiasi, tasi lena fale e tatau ona fai le fale o le fomai i tulaga e pei ona i ai. Ua uma ona i totonu o le polokalame alualumamao foi a le tatou Malo sa i ai, o lea lava e taumafai e tilotilo i mea e ao ona faaauau aemaise tulaga o le tulai mai.

E i ai nai faafitauli laiti sa maua i le asiasiga, a o mea e mafai ona fai, o mea e mafai ona fetuunai, ona o le leai o fale o fomai e nonofo ai. O faafitauli la ia o le tuai atu o le fomai i le falemai, ua leva ona nofonono nai tagata mamai, a o mea na, ou te iloa e faafoia um ape a oo ina uma foi ona talatalanoa i nai fomai. A o fomai foi o alo o le atunuu e i ai le

tomai, e i ai foi le tulaga e pei ona i ai, e tatau lava ona i ai tulaga maopoopo ma mea e malu ai i tua i tatou nuu i tua.

Lau Afioga i le Fofoga Fetalai, e matuia lafoga a le sui usufono mo Palauli faapea o lo o tele ina pei e faatalasua, ae ou te iloa le sui usufono faapea na o le avatu lava o mai i Tuasivi ma maliliu, avatu ma maliu pe aisea. Lau Afioga i le Fofoga Fetalai, o le Atua e pule i le soifua ma le ola. Po o ai lava le fomai o le polofesa o le a taoto le ma'i i le taimi lenei, ae afai lava e faapea le Atua ua uma lou taimi, ioe, ua uma. Lau Afioga i le Fofoga Fetalai, ou te manatua talu ai nei sa gasegase ai le sui usufono mo Palauli i le falemai, sa poloaiina lava fomai, aua ne i oti, aua nei oti le sui usufono o se tagata aoga. A o lea ua faapea mai, ia, lau susuga i le sui usufono mo Palauli, ia, e faapena le soifuaga. O le tatou naunautaiga, a o le tulaga, aua foi ne i tatou upuvale i fomai, o alo ma fanau aoga ua i ai le tomai o lo o galulue i tua i tatou falemai. Tasi lea mea o lo o ua tofu lava tatou falemai ma fomai, e pei o polokalame sa faataoto mai. Na pau lava le fautuaga sa talatalanoa i CEO ma le Matagaluega, silasila, a i ai ni nai fomai i Tuasivi, e tatau ona i ai nisi e poto faapitoa e pei o le vaaiga o tamaiti, le vaaiga o tina maitaga se i tulou, aemaise foi mai fatu, e tatau lava ona i ai ni nai... ae o le tulaga sili ona taua o lo o i ai fomai o lo o tauavea tiute ma tau atu i ai o tatou tagata.

Lau Afioga i le Fofoga Fetalai, ona ou oo mai lea i le sui usufono mo Salega 1 ia Fepuleai, le Susuga i le Aloalii. O le talanoa a Fepuleai e tasi le taavale. Tasi lena lau Afioga i le sui usufono mamalu, o Falemai uma lava, e tasi lava le taavale e fai ai galuega a falemai. A o lea la o le a faalua nei pe a avatu le taavale lea avema'i ia faigofie le feaveaiga o tatou gasegase i tulaga e pei ona i ai. Ou te manatua, o le taua ia o le mea lea lau Afioga i le Fofoga Fetalai. O la e ou te moe i le po ae tatagi lau telefoni, e ese lou fiafia i le mea lea, a ua vili mai le sui usufono lea o Faiaai, "Valasi, si toeaina ma'i ua oso le fatu o le tamaloa collapse ae ua taofia la i Foalalo." Ou fai atu loa lea i le sui usufono ua vili mai, ou fai atu, "Aua e te popole, tatalo i le Atua ia aumai se ola ma se malosi, ae o le a ou faagaoioi atua leaga e tatau ona silafia e le CEO i ala o mea, ia ma latou o lo o..." Ia, tatalo lea ina ia aumai le toeaina i le ambulance e aumai i le... o lea lava na silasila, na matua faafetai le sui usufono i se Minisita mataala e le moe, na o le avatu lava o le talosaga sau. Ia, lau Afioga i le Aloalii, aua la e te popole, o lea o le a i ai foi le ambulance mo Foalalo, leaga o mea ua uma ona faataoto, aemaise foi le tulaga o le faaleleia o fale ma tulaga faapena. Ae faafetai o lo o i ai foi si tamaitai fomai i totonu o le lotoa aemaise foi tulaga e pei ona i ai.

O le saunoaga a le Tofa a Seuamuli aemaise foi le itumalo o Avao, e sao lelei lau fuainumera na aumai i lau asiasiga i Safotu, e 18 moega. O le taimi na ou asiasi atu ai, o le tele ia o moega e le o faaaogaina. Masalo pe lua ni mai, ua lava ma totoe i lau tilotilo, ae masalo o le a vaavaai totoa i ai, e i ai nai mea e fia faaleleia pei ona talosaga Faimalo. Ia, o mea uma ia, e pei lava ona fai atu, e le i faua Roma i se aso se tasi. A o le vaai a le Matagaluega i le taimi lenei, sa ou talanoa i le CEO o le a sau fua... Aua o le isi lea mea e tupu i gaioiga nei, e tuuai le MOF, Ministry of

Finance, tuuai le feuiuiaiga o mea faapea e tuai. O lota naunautaiga, sa ou talanoa i le CEO, afai e 5 falemai lea o le a fau, e tatau ona 5 lava galuega e tatau ona pao i le taimi e tasi, ia vave ona e moomia. Taumafai ia ta tilotilo lelei i faiga faavae aemaise tulaga o mea, aua o isi fale, e pei foi o lea e taua aua o lea ou te talanoa lautele atu i le tulaga pei ona i ai, i le falemai i Saanapu, le falemai i Falelatai pei ona taua e le sui usufono o Falelatai, ua uma ona ma oo atu i ai ma vaai le tulaga e fau ai le falemai, aemaise foi Saanapu, o falemai ia o lea sa faataoto mai, e tatau ona fausia. O lea la e i ai i totonu o le Tala o le Tupe, ua tatau ona faagaioi. O le tulaga e sili ona taua i le vaai, o le i ai o vaegatupe nei e faagaioi ai falemai ia aua ne i faatamala, aemaise foi ia tofufufusia tulaga uma i faamanuiaga, aemaise foi le mea lea e aumai ma tagitagi mai ai tatou sui usufono. Faafetai i sui usufono, e le o se mea e aveane ai tulaga e pei ona i ai le talosaga, leaga e faapena le uiga o mea. O talosaga e aumai, ia tilotilo i ai le Matagaluega. E pei lava ona ou fai atu, e le faia e le Minisita se faaiuga, e aumai lava, aua e uma lava ona faataoto le Tulafono o Matagaluega, ia e faafoe lava e CEO tulaga e pei ona i ai latou ia. Na pau lava le mea o le faufautua ma tulaga e tatau ona faataoto i ai, a o mea uma, o lea lava ua faataoto tulaga uma.

E i ai le mea na taua e le sui usufono lea le Susuga ia Seuamuli, le tulaga foi lea o le aumai o le mai mai Savaii tuu i Leulumoega ae toe foi le ambulance, ia ae faaoo mai... ae taoto ai i ina le mai ma faaoo mai i le tulaga e pei ona i ai i Motootua.

O le polokalame lava ia e faapena, ae le mafai ona taoto ai le tulaga e vaai o se ma'i po o se gasegase e tatau lava ona faaoo mai e le ambulance lena e sau mai Savaii i le falemai i Motootua. Ae a i ai lava gasegase foi nei e vaai atu e stable le tulaga, ia leaga e toe alu le taavale e toe tuli le vaa i le tulaga o le faaaogaina foi i Salafai. A o le agaga lena pei ona i ai nai fetuunaiga, ae le mafai lava ona taoto ai se tulaga ua maoae ma silasila fomaini i tulaga foi pei ona i ai tulaga e pei ona tulai mai pe afai e faaletonu.

Ia, o le talosaga foi lea a Agaseata se i tulou le suafa, i Aana, o le taavale lava o le ambulance. Ia o lea ua ou fai atu, o lea ua taunuu mai taavale e 7. Ou te iloa foi o le a silasila i ai le CEO i tulaga uma i mea e ao ona fai, a o le talitonuga ma le mea taua, o lea ua outou faafofoga mai. A lelei lava la le amio a le sui usufono, e vaai mai ua avatu le taavale, ae a faaletonu, ia e te i ua toe cancel e le CEO ma au le taavale.

O le Susuga ia Magele. Ia, Magele, le sui usufono mo Iva, e pei lava o lea foi e fautua i tulaga uma lava. Faafetai mo le fautuaga ma le tuualalo, a o mea uma lava ia ua tapena i ai le Matagaluega i mea e ao ona faaleleia, aemaise foi o le tulaga i le faaleleia o le falemai i Tuasivi e agai i ai le tatou motu. Ma ia aua ne i galo e i ai le mea ua faataoto e le Malo talu ai, o le a fausia se falemai tutotonu i Salelologa mo Salafai. O se health centre lea mo Savaii. Ua ou oo foi i ai ma asiasi le site lea po o le tulaga o le mea e tu ai le falemai. O se fuafuaga lelei tele, o se fuafuaga matagofie aua e tau fai omai itu o Salafai ma taunuu i ai aemaise foi le faagaioiga o tulaga uma i lo le tau aumai ave i Tuasivi, a o lea ua i ai le

fuafuaga. O lo o faagaioi foi na fuafuaga, o lo o ua faagaioi foi fuafuaga a le Matagaluega, silasila totoa i ai i tulaga e pei ona i ai... Ia, tatou i Salafai, aua tou te popole, o fuafuaga lava e le i faua Roma i se aso se tasi pei o lau tala, a o lo o vaavaai mamao i le taimi ma tulaga e pei ona i ai ia...

O le vaai i le taimi lenei i le ratio o le fomai i tagata Samoa e vaai e le fomai, ua fautuaina mai foi e le CEO ma latou o lo o i ai le potu masani ma faapitoa, tusa o le ratio lea e i ai i le taimi lenei, tusa e 1 le fomai i le 1,000 tagatanuu o le tatou atunuu. O lona uiga e taua tele lea mea. O le isi mea aua nei galo ua uma foi ona matou feiloai ma le asosi a alii ma tamaitai o Samoa, aemaise foi le au tausisoifua, ia, o lo o taumafai. E oo foi i fomai... e 18 fomai o lo o faiaoga i le Iunivesite. Sa ave foi i ai le fautuaga ma le tuualalo, ina ia faaoga isi o latou taimi e pei e part time ina ia meet le tulaga lea o le faaogaina o fomai ma o lo o moomia. E pei o se tasi lenei o lo o taoto ai le fuafuaga ina ia fai ma faafaigofie tulaga faapena, aua lava tulaga o le faasoasoatau o tatou fomai. O lau tilotilo foi ma vaavaai i le mea lea aua e pei ona i ai foi le fautuaga a le au... e pei ona faataoto mai foi e le Malo, le tulaga foi lele ia fausia se fale faapitoa mo specialists foi nei e omai fafo e taoto ai lava tatou mai, i lo le tau ave i fafo. Sa ma faasoai foi ma le Afioga i le Taitai o le Itu Agai i mea o lo o ua faataoto. Ona omai lava lea o fomai, aua o le taimi lenei, e matautia le mea o lo o i ai, ua faigata ma poloka uma tagata e gasolo mai i ia foi potu faapitoa ona ua tatou malamalama i le Koviti-19 ua aafia ai le lalolagi, ae o se fuafuaga lelei tele, aemaise o tatou e taoto loa uma, tasi, lua aso manao e alu i le fale, ae tataua ona taoto lelei se i manuia i se mea faapitoa lea o le a fausia ina ia mafai ona manuia ma lelei ona faatoa alu le i le maota ma le laoa. Ia pei o nai fuafuaga mamao na o lo o tilotilo i ai i le tulaga pei ona i ai le faataotoga o fuafuaga uma.

O lo o ia au foi le table sa ou talosaga i le susuga i le... aofai o tagata faigaluega i lea falemai ma lea falemai ma meatotino o lo o faaoga ai taavale ma mea uma. O lona uiga, o lo o manino lelei le Minisita i meafaigaluega o lo o i lea falemai ma lea falemai aemaise o tagata faigaluega, o tamaitai tausisoifua, o le fomai, o isi vaega e i ai le au cleaner, sikulati, o lo o manino mai i tulaga e pei ona i ai. O lona uiga, e faapena se lagona.

E i ai le isi mea e fia paia, o le tele o seleni ia e tuu atu i tua e tatou, ua outsource tatou... pau lava lenei o le mea o lea ou te talitonu e aumai foi se fautuaga a le la itu, aemaise foi le tatou... o le tele o taamilosaga ia sa fai, o le tele ia o mea o ea malulu ma ili, na o le tutu ae le ola. O faafitauli foi lenei o lea sa asiasi i ai i tatou falemai, e mafua o mea o konekarate ia e faia. Sa ou fesili lava i le CEO, e i ai le follow up maintenance check up foi lele i tua ina ia mafai ona ola i tulaga e pei ona i ai? Tasi lenei complain. Ta te alu atu o la e faapale mai mea o le sisina a le ea. O le maota lenei e le natia ni mea, leaga o mea o la e vaai i ai. Sa matou talanoa la ma le CEO ma le Pulega ae faamatala mai o paipa foi ia na fai i le falemai lea o Saina, ua sao mai le vai foi lele ua faigata la ona... o le uiga la o le tala, tasi ia o mea o la e foi ua silafia e le Matagaluega e tataua

ona fai i ai se fofu, ia ma le tele lava o mea laiti faapena. A o le tulaga uma lava o faagaioiga ma galuega fai, e ese le taua i le tulaga e pei ona i ai le tatou...

O nisi o manaoga e pei ona ou fai atu, ua ou talanoa atu i le tulaga afai lava o faafofoga mai le sui usufono ma o latou manaoga sa aumai, aemaise foi le Afioga ia Fonotoe ma tulaga e pei ona i ai le sui usufono mo Lalomanu, o ia mea uma e aoga tele.

FOFOGA FETALAI: Se i fai mai se malologa a lau Afioga i le Minisita. Se i tulai mai le sui usufono mo Lefaga ma Faleaseela.

Afioga Masinalupe Makesi Masinalupe (Lefaga ma Faleaseela): Lau Afioga i le Fofoga Fetalai, faafetai i lau Afioga mo le avanoa. Ou te tulai atu i le ava ma le faaaloalo ona o lea ou te matau atu, e manaia le saunoaga a le Minisita. O lea ua faasolo ina vevela lou toto ona ua uma mai lava Savaii e le i taua lava le falemai o Lefaga ma Faleaseela. O le uiga o sau faamatalaga, ona o le mea lava ua leva ona ou leotele mai ai i o i lau lauga faataupou, ona o la e faafofoga mai si o matou itumalo, ia o le mea lava lea na nanau i ai le itumalo, a o lea e le o taua mai e le Afioga i le Minisita. E oo la i... aua o mea lava ia na ou talosaga ai, falemai, o se fomai atoa foi la ma se taavale. O lea ua uma lava taavale ona faasoa i Savaii, a o lea lava e le o i ai se faasoa mai o ni taavale i Upolu. Ia, ae faamalulu atu, ona o lea sa ou lauga muamua lava i o, a o lea ua alu atu lava isi au vaega ia e mulimuli atu o lea ua aumai, ae e te le i tali mai lava i le manaoga o le sui usufono mo Lefaga ma Faleaseela. Ia ma le faaaloalo lava. Faafetai.

FOFOGA FETALAI: Ia, ua i ai le mea ua tupu, ua faataga atu oe o lea ua uma ona fai le faatonuga a le Nofoa se i fai mulimuli, ae le afaina, e faamalulu atu i lena itu. E lelei lava le saausi lelei lava o le saunoaga a le Minisita, ia, faaauau le saunoaga a lau Afioga i le Minisita.

Afioga Hon VALASI LUAPITOFANUA TOOGAMAGA TAFITO SELESELE: Faafetai. E fetai lava le tulai mai ma le tali. Lau Afioga i le sui usufono, e faamalulu atu, o lea e mau i lau api. A foi sa ou fai atu muamua, afai e misi pe galo, e le mafai ona galo i faamaumauga. O lea sa e tatalo i se falemai. E le mafai ona avatu se taavale pe a leai se falemai. Mo le silafia la Lefaga ma Faleaseela, o lea ua faamau, aua leaga o lea sa matau, e i ai foi le polokalame ua uma ona faataoto e le faigamalo foi muamua, ia fai mea o sub-centres. O lea i ai le polokalame lena, o lea foi e lavea ai Lefaga, aemaise foi Siumu ma tulaga e pei ona i ai, ia faafaigofie aua o Lefaga ma Faleaseela, e pei o le latou falemai Leulumoega. A o faafofoga mai lau Afioga i le sui usufono, o lea la e taua tele i le tulaga e pei ona i ai. O le sui usufono foi lea sa tasi le aso na alu atu ia te au i se wheel chair o si ona tama ua mutu le aao se i tulou. E tasi le aso a o le isi aso ave le wheel chair. Ua e vaai i le vave. O lona uiga, o la e molimau, sa tatau ona tu mai fai mai sana faafetai, a o le tu

mai lea manao i le falemai ma manao i le ambulance, malie e i ai se taimi. Taoto mai lau talosaga ae alu e faagaoioi mea uma, aumai se tusi a le itumalo i ala o mea ia faavae lelei ai le tulaga, a o lea ua i i le api, e faamaumau uma lava mea e leai se mea e misi.

Ia o le tali atu lea, sa faapea ua maua lau wheel chair, o le a e le manao i se ambulance.

FOFOGA FETALAI: Ia se i faauma pea le saunoaga a le Minisita ona toe maua lea o sou avanoa, leaga o lea ua tau soli e taua le Tulafono ua uma ona fai atu.

Afioga Hon VALASI LUAPITOFANUA TOOGAMAGA TAFITO SELESELE: Ia, taumafai e usitai i le Fofoga Fetalai. Se i vaai o la e nonofo filemu mai le la itu e usitai, a o tatou... E ui o lea lau Afioga i le Fofoga Fetalai, o le tulai soo mai, e kolosi ai le talosaga.

E ui o lea, e momoli le agaga faafetai i sui usufono uma sa sausaunoa e ala i le soifua maloloina. O lea e manino lau tala, e i ai le polokalame ua uma ona faataoto e le faigamalo talu ai i sub-centres ma tulaga uma, o lea lava e tilotilo i ai i le tulaga o le faagaoioiga.

O le faafofoga mai sa fesiligia foi le tulaga e pei ona i ai le fale o le au tausisoifua sa pasia foi e lene faigamalo, o lea foi sa toe tuitui ia Leausa ia vave le galuega lea o lo o moomia e tamaitai tausisoifua le tulaga e pei ona i ai le latou hall ua leva ona faataoto e le Susuga ia Tuilaepa polokalame, ae pei o lea lava e... E pei o mea ia o le process o mea, aemaise le tau suea o konekarate ma mea o designer, pei tasi lea mea ua taugata atu designers i le aufai konekarate lea e faia mea... o lea la e tau fautua, e mafai ona teuteu mea nei a ia vave ona faagaoioi tulaga uma. O le ala lea o le faafofoga mai o lau Afioga i le Fofoga Fetalai i tulaga uma, e leai se mea o lilo aua sa faapea le isi vaega foi lele e i ai Lealailepule, o a mea a Valasi e alu e fai i le falemai e le o ia o se fomai? Ae matautia le mea lea ua i ai Lealailepule le Matagaluega. E pei lava ona e faafofoga mai i le faafetai sa momoli i le Matagaluega i le galuega fita, e leai se mea o lilo i le silafaga a le Atua. A o le agaga sili ona taua, faafetai i sui usufono uma sa sausaunoa ma faafetai mai i le Koviti-19, ia puipuia tuaoi. Ma o le mea lava lene o lea e taumafai le tatou Palemia ma le Kapeneta ina ia puipui ma leoleo i so o se taimi, aemaise foi tulaga e pei ona i ai. O lea foi ua silasila ma faafofoga ua faagaoioi tulaga uma pei ona i ai tui puipui ia mafai ona tele tagata o le tatou atunuu e puipui mai le Koviti-19. O le tele ia o faafitauli i le ma faigamalaga i Savaii, lelei le faagasologa o Salafai. E ese le taua. Faafetai atu i le motu i Salafai mo le faagaoioiga o teams ia e agai i tua, e leai se mea. A o le tele o nisi o tatou nuu i inei, e pei lava e tau lavea ai Vaitele. E tau mai i i areas nei e le o galue le sui usufono. O Vaitele le isi mea o lea e faafitauli ai tagata e fia... a e faafofoga mai la lau Susuga Lealailepule, e tatau ona o atu tatou teams ia taeao ua laina mai lou nuu po o lou itumalo. E i ai lava le tagata e le sau, atonu e ita ia oe, ae aua e te popole. Na pau lava le mea ia aveese le faamai, a o le taua ia o lea mea o le tatou galulue faatasi. O le tatalo

foi lena a le Minisita i tulaga e pei ona i ai le tatou galuega. Ia ae leaga o lea ua tulai mai le tamaloa.

Tofa Lealailepule Rimoni Aiafi: Faafetai lava i lau Afioga, e le o se solifono lau Afioga, ae na ona ou faamanatu i le Afioga i le Minisita, o au le tagata e lagolago tele i le tui. A molimauina i le tui o le tausaga lea o le misela, e lua aso o matou feoi ma foma'i e... O taeao la, ma te o lava ma si ou Minisita e fai tui o isi e le i tui. A o le taimi lenei, o le pasene la ua i ai... ia ma le faaaloalo lava.

FOFOGA FETALAI: E le o se faauilavea, ae ona ua taua le suafa lau Afioga. O le ala lea ua ou tuu atu ai le avanoa. Ae le o se faauilavea, o lea e lagolago atu i le galuega a lau Afioga i le Minisita. Ia saunoa mai.

Afioga Hon VALASI LUAPITOFANUA TOOGAMAGA TAFITO SELESELE: Faafetai o lea ua maua. Faafetai Lealailepule, e to lou pulou. E pei lava ona fai atu, a tatou tutu faatasi, e leai se faamai e oo mai. Aua e tele isi aiga e ese le malie, e fai atu ae fai mai, ia e le oo mai se Koviti-19, o ituaiga manatu foi ia e pei e avea le le ano i ai ma mea e ono tulai mai i se taimi faafitauli, ona toe oto lea o le pulou a ua timu ma fai le upu foi lele, a na iloa.

Ia afai o faafofoga mai le tatou atunuu, ia avea ia lenei lauga e momoli atu ai le feau i le tatou atunuu, tautuana le faaavanoaina o taimi taeao aemaise foi le Aso Faraile, ia tatou mulimulitai i tulaga e pei ona i ai. Ne i mea o i ai se mea o misi, a o le aotelega o mafaufauga ma manatu, e pei lava ona ou talanoa, o le tatou falemai i Motootua, tatou falemai i nuu i tua, ua vaavaai totoa i ai le Matagaluega. E taua tulaga uma.

Avea lenei taimi ou te faafetai ai i le Komiti a le NEOC, le Taitaifono ma ona sui auai uma. E ese le taua. A silasila i mea na faataoto mai ma le tulaga o le puipuiga o le soifua ma le ola o Samoa, e to le pulou. Faafetai i la outou galuega, faafetai i tulaga uma, ua faaitiitia Pili o le alofa ia Sina. O le a le uiga o lena upu? Ua faaitiitia outou mamalu o le alofa ia Samoa. Faafetai i le galuega, e le selu atu. Ae le faigofie, e le faigofie. Faafetai i la outou tuualalo, la outou talanoa i le Kapeneta i le tele o taimi, e ese le taua. O le uiga lea e le mafai ona alulua lau tala ae le i momoli atu, leaga o lea tatou te vaavaalua i le tulaga o le faagaioiga o mea uma.

Ona alu alu lea o sau tala lau Afioga i le Fofoga Fetalai, ou te iloa ua le o toe i ai se mea o faiga faavae ma tulaga uma, o lo o i ai le isi tatou vaega i lalo o lau vaaiga e leai ma se isi na lauga mai ai, o le faamamatoto o le tatou atunuu, aemaise foi o le Oceania University of Medicine, o lo o pulea foi e se tasi o laua o le atunuu, le Susuga ia Toleafoa Manufalealili Dr. Viali, aemaise foi e to le pulou i tulaga uma. Ua auma foi latou lipoti ma matou vaavaai i ai ma tulaga uma, faafetai tele. Malo le galulue. O le tele o tamaiti aoga mai fafo ua le mafai ona avanoa ona o tulaga o le faamai ma puipuiga. E le aoga foi ona tatou naunau e faaauau nisi o mea faapea, ae afaina ai lo outou soifua ma lo tatou ola.

Lau Susuga Mulipola, ia, malo galue. O le tulaga o lo o i ai le ta Matagaluega o le Faamamatoto se i tulou, e ese le matagofie. Ua uma ona ou asiasia le mea o le a sii i ai le tatou fale lea, ua uma ona faapipii uma tulaga uma, vagana o lo o faatali inisia mai Siamani e faagaoioia mea o masini vai foi ia i le tulaga o le faagaoioiga o ia mea uma, a ua manaia le mea la ua i ai nei. O lo o ua i ai foi tulaga e pei ona i ai Salafai, ua i ai le faamamatoto i Salafai i Tuasivi ia aemaise foi i latou o lo o 24 itula le taamilosaga o mea uma nei ona o le manumanu ne i mea ane ua afaina ia le soifua.

Ia le Matagaluega e, toe foi atu lava ia lau tala, faafetai tele e to lou pulou, si tamai taimi sa o tatou galulue ai, ae e ese le matautia o la outou lagolago i tulaga e pei ona i ai ia le tatou faamoemoe. Aemaise foi o le lagolago mai i so o se faamatalaga i le Minisita tou te aumaia le fautuaga lelei, fautuaga e manuia ai lo tatou atunuu. Ia aua ne i outou aveesea se agaga ia te au nei, o le agaga lava ua o tatou galulue faatasi. E pei ona tatalo atu le tele o Minisita, ia o tatou galulue faatasi.

O le tou Minisita e le o se Minisita nofonofo, e galue e savali e i ai nisi taimi e ta te alu atu e faatonu, ia sa fai foi e Faimalo, ae faafetai Faimalo, ae ou te le i nofo i lalo faafetai tele le faaauauina o galuega ma tiute. E le gata foi i lea, o e sa tulai mai i tofi Minisita, aua ana leai na taimi, e leai ni taimi nei. O le uiga la o le faamatalaga, o lea ua taunuu atu ma faaauau ia le fesootaiga o mea uma, e i ai lava mea o lo o i ai ia o mea laiti, o mea e tatau ona toe tilotilo i ai. O mea e tatau ona foia, ae o le agaga taua faafetai tele mo le galuega i tulaga e pei ona i ai ia mea uma, ia faafetai foi i galuega i le Taitai o le Itu Agai aemaise foi o i latou uma i le Faigamalo a le HRPP, ia e le fai atu se tala, matagofie mea uma. O lea ua o matou faaauau aua tou te popole, aumai ia le tou faatuatuaga i le Faigamalo fou o lo o tulai mai, ia manuia i tatou uma.

Ona oo atu lea o le a fai sau tala i lou itumalo...

Tofa Hon Tuuu Anasii Leota (Siumu): Lau Afioga i le Fofoga Fetalai....

FOFOGA FETALAI: Ia malie lau Afioga, ia maua pea sina avanoa mo... ona e pai foi lea i lou itumalo o lea sa i ai nisi o sui usufono mamalu. Ia ou te iloa ia le Itu lea ua faamalieina uma latou i le saunoaga. Ia ae o lo o i ai nisi o le Itu lea o lo o i ai nai mataupu sa laga. Ae ou te talitonu, ia o lea ua matua malamalama ia le saunoaga a le Minisita. Ia ou te talitonu foi ua leai lava nisi mea o totoe.

Ia o lea ua i ai le... ia le silasila mamao a le Afioga i le Minisita aua ia o tatou itumalo. Ia o lea foi ua ia te au le lisi mai totonu o le tatou Hansard o e na lagalaga ia o latou finagalo. Ia o lea ou te vaai atu o lea e tulai mai ia Tuuu e le o i ai sou suafa i i Tuuu. E i ai se mea na e taua ai ai le falemai?

Tofa Hon Tuuu Anasii Leota: Sa tele lava lau lauga ananafi lea sa taua ai le le lavava e lo matou itumalo ona savavali i Falealili.

FOFOGA FETALAI: Ia saunoa mai

Tofa Hon Tuuu Anasii Leota: Lea sa ou taua ai ia le fai o le matou falemai lau Afioga. Faafetai o lea ua saunoa mai ia le Afioga i le Minisita, leaga o lea foi sa taua ia lo matou itumalo. O lea la faapea leaga o lea e le o manino mai, po o le a tonu le mea lea ua i ai ia le matou falemai. Po o le a le isi mea lea o le a ou alu e fai mai, o la e i ai le falemai, i ai ma le eleele e fai ai le falemai.

Ou te le talosaga la i se taavale, a uma loa ona fai le falemai, ona faatoa ou talosaga lea. A lea o le a momoli atu lau faafetai i lau Afioga i le Minisita. Manuia le Fono.

FOFOGA FETALAI: Faafetai, ia tulai mai le... malie lau Afioga i le Taitai, po o le a sou finagalo? Se i faamuamua mai ia... ona faaiu mai lea... ou te tuuina atu le avanoa i lau Afioga, leaga o lea sa e saunoa faalauaitele i le tamaoaiga. Ae malie se i tuu atu pea le avanoa i ai latou sa saunoa. Ia saunoa mai le sui usufono mamalu mai i le Vaa o Fonoti.

Tofa Mauu Siaosi Puepuemai: Faafetai i lau Afioga i le Fofoga Fetalai, matagofie foi ia le saunoga a le Afioga i le Minisita o le Soifua Maloloina. Ia ae tulai atu ma le faaaloalo, ia ou te iloa lea sa ou lauga i lau lauga faataupou taua ai ia le tatou falemai i Fagalao.

Lo tatou itumalo, ia o lea ua o outou faafofoga mai, o lea ua tusia ia le falemai o le Vaa o Fonoti i le Tusi o le Ola, ua le taua iinei, ia ae lea ua saunoa manino ia le Afioga i le Minisita, o le falemai o le a le tolaulauina i le Maota, ia o lea o le ave i ai ia le faamuamua. Ia ma le agaga faaaloalo faafetai.

Afioga Hon VALASI LUAPITOFANUA TOOGAMAGA TAFITO SELESELE: Se i ou tali atu muamua ona tuu lea o le avanoa i le Taitai. Se i ou tali muamua i le aualii ia.

FOFOGA FETALAI: Ia saunoa ia lau Afioga i le Minisita.

Afioga Hon VALASI LUAPITOFANUA TOOGAMAGA TAFITO SELESELE: E sao lelei ia le Afioga ia Tuuu, o lea e faamau lava i i lana talosaga i le falemai o Siumu, faafetai Tuuu. A foi o le polokalame lea o lea e faataoto e le Malo. Ia atinae sub centres. Ia e manatua o lea ua faagaioi, e pau le mea o le toe faamanatu mai i sau tusitusiga ma saina mai tagata po o le a le tulaga o i ai i le falemai. Ia pau lena o...

O le Fagalao, faapea au ua uma ona faamatala atu i ta taumafataga i fafo ua uma ai. E sili atu le aloaia o fafo o lea e ta te feiloai. Ae ui i lea, o lea lava e ta te manao e faafofoga mai. E pau lau talosaga, afai e le o faaaogaina le falemai lea na fai e Tialavea, toe tala ae sui se isi fale.

Ae o le mea o lea e fia manino, aua o lea e te talosaga mai e pei lava o le mamao ese i le isi pito, ae o lea e faapea e tuu mai i luma. Ia o le CEO foi o le Fagalao, ae aua e te popole, o lea o le a ma feiloai ma le CEO, e

le faapea o le a faanuu pe faaaiga, ae o le a taoto i se lagatonu ma e manaomia foi oe, ia ma se saina a le tou... pe a fai e faaaoga le falemai na, ia ua talafeagai. Ae afai e feinauui e pei o le feinauui lea na sii ai le isi falemai i le mea mamao, ia ou te talitonu ae aumai sao i le tou itumalo pe o fea tonu e taoto ai le faamoemoe. Ia e pei o lau tali atu lea lau Afioga.

FOFOGA FETALAI: Ia faafetai, o lea ua malamalama lea vaega.

Tofa Mauu Siaosi Puepuemai: Ia faafetai i lau Afioga i le Fofoga Fetalai, o le mea sili ua manino lea vaega, ia o lea o le a faamuamua ia le matou falemai faafetai.

Afioga Hon Lautafi Fio Selafi Purcell: Lau Afioga i le Fofoga Fetalai, e tasi lava lau Afioga...

FOFOGA FETALAI: Ou te le o vaai atu i lou suafa...

Afioga Hon Lautafi Fio Selafi Purcell: Na ou lauga foi i le Tala o le Tupe i lona aotelega.

FOFOGA FETALAI: E na o le Taitai lava lea ou te faatagaina atu e lauga i le aotelega.

Afioga Hon VALASI LUAPITOFANUA TOOGAMAGA TAFITO SELESELE: O le ala foi lea o lou le taua, lau Afioga e le i saunoa le sui usufono i le falemai. Na tele lava le toatamai solo ae galo ai le falemai o Satupaitea. Ae aua e te popole si ou uso, o lea ua i lalo o le lisi.

Afai la sa e faafofoga mai, Satupaitea, o lena foi ua i ai le isi fale o fomai. O lena e manino i ai ia Faimalo, ae aua e te popole, o la ua uma ona tusitusia. Afai lava e tusitusia i lalo nei, tusitusia foi i luga. Ia manuia.

FOFOGA FETALAI: Ia o lea... ia

Tofa Hon Faimalotoa Kika Stowers Ah Kau (Gagaifomauga 1): Faafetai tele i lau Afioga i le Fofoga Fetalai mo lenei foi avanoa. Sa tele nai vaega ia sa ou fau mai ai lau lauga ona o le tusi lea i le saunoaga a le Minisita o Tupe i le tatou Tala o le Tupe.

E le toe faia ia sau faamatalaga, malie atoatoa lou loto i le folasaga a le Minisita. Faafetai o lea la ua a foi? Le alu atu o le isi ua faataatia ma lelei fuafuaga ma galuega, to lou pulou. Faafetai o le ala foi na na ou faafetai atu ai, ina ua maea nai vaega ia ou te vaai ai i totonu i i, o le tele o galuega ia e tau ai ia le Soifua Maloloina, o galuega faaauau na fai mai e le tatou Faigamalo talu ai.

E momoli atu ai lau faafetai i lau Afioga. Alo i ou faiva, matou tapuai atu, ia na foi ua toe faafofoga mai ia le afaigaluega, le CEO ma le afaigaluega atoa, po o le a lava le galuega o fai, malo le fai o le faiva, malie le finagalo o le Minisita, faafetai o le tatou tala foi lea. O le a le

mea e te faia, fai ma lou silafia, o lo o sisila fofoga o le Atua i lau galuega lena e fai.

Lau Afioga i le Minisita, to lou pulou, manuia ou faiva.

FOFOGA FETALAI: O lea ua matau atu ua tulai mai ia le Taitai...

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai, e pau lava ia o mea sa ou tulai atu ai. E taua tele ia le tulaga i le fale teu oloa lea ua i ai nei, vailaau. O le taua o le teu oloa vailaau, e leai lava se mea e tatau ai ona toe short ia vailaau po o Upolu po o Savaii. E taua tele le tulaga lea, aua le toe faatali fua ia isi falemai ia i Tuasivi. O lea ua fesootai ia faigofie ona fesootai atu le falemai iinei i Savaii, ia po o le telefoni foi.

O le mea lea e ala ai ona aafia ia o tatou tagata, o le le faaaoga o le common sense e i latou o lea e vaaia falemai nei. O lea e i ai ia le tatou faleteuoloo e maua ai vailaau i so o se taimi ma fualaau. E taua tele le vaega lea o le saunoaga a le Minisita.

O le itu lona 2, o le faamama toto o lea ua i ai na amata i Upolu i le 2006. O lea la ua i ai Savaii. Na amata ia le faamama toto lea e na o le toafa lau Afioga. Ua ova i le toaselau le iloa pe ua selau ma ona tupu e 32 ea i le falemai i Apia, ae o lea foi ua faatu le faamama toto i Savaii. Ia ou te le iloa pe toafia la e i ai.

Ae o le taua o le itu lea lau Afioga i le Fofoga Fetalai, sa i ai le isi polokalame, ua le o toe faia nei, ae e tatau lava ona toe fai, ina ia iloa ai tagata ua tatau ona faamama ia o latou toto. E tatau lava ona toe amata ia le polokalame lena, ae amata muamua atu i i le Maota. E le iloa pe ua leva ona tatau ona alu ia le Fofoga Fetalai e tatau ona amata ona fai ia ni ana togafitiga. Ia ma tatou lea e iinei ae o lea e tatou te le o iloa. E mafai lava ona oo le tagata i le 90 tausaga lona matua ae o la e lelei ona faapolokalame ia le faamamaina o le toto. Ua le o toe faia le polokalame lenei ou te le o iloa pe o le a le mea ua le toe faia ai. Ae e lelei ona toe amata.

O le vaega lona 3, o le itu lea o le palliative care lea foi sa e taua, e taua tele. O le uma o taotoga faigata, ona sosoo loa lea ma le care, special care. E faigata tele ona faatino le faiga lena i le sau i tua ona e i ai lava le itu maaaleale e tatau ona vaaia lelei e teine tausai mai. Ua tele o tatou tagata maliliu, talu ai o le mea foi lea o le uma loa manao ia le aiga e ave i tua. E le o mafai la ona maua e le mai ia le tausiga e tatau ai. E tai pei o le mea lenei ia lava le malologa. Ia o tatou e avatu loa i tua sau le asiga a lea, fai le faigalotu. Ae e tatau ona moe, malolo aua nei toe faalavelaveina e se isi.

O lea ou te manatu ua taoto fuafuaga aua o le tasi lea o luitau e ogatasi ma le faamoemoe lea na i ai e tatau ona fai pea ia se tatou falemai, se special unit iinei, e togafiti ai lava ia o tatou tagata e aumai fomai i fafo e latou te faatinoina iinei taotoga. Ia ma faaaoga ai loa ia fesootaiga tau telemedicine, e faatino ai taotoga iinei e le toe avea i fafo. Aemaise o lea ua oo tatou i tulaga maaaleale, ua oo mai ia faamai leaga ia e tatou te le

iloa po o le a faaauau ai pea ma nisi mai leaga e tulai mai, ae o lea ua i ai le fofo e tatou te amata mea ai.

Ma le vaega 4, le falemai lea i Avao, na ala ona fausia le falemai lena, e see i ai i uta ia le falemai lea o le Health Centre e i tai i le Nuu. Ae na faaaoga i ai fale ia sa i ai le Aoga e i uta ua tapunia ona e le tatau ona faaauauina, o lea la na toe fai faalelei ai le fale faa-falemai lea e faaaoga e Avao.

O le mea lea o le a foi le mamao i uta, i le taimi lenei, ua leai lava se mea o toe mamao ona ua tele taavale a aiga ae e pei o le manatu foi lea, pei a 100 loa iata fai mai ua mamao, ae e leai se mea e mamao i le taimi nei. O le tulaga sao lava, toeitiiti lava tai pei o Safotu ia le falemai lea. Ae e lelei ona faaauau pea, manaia le faamoemoe. Pe te i ua i ai se isi faaaoga faapitoa.

Sa i ai nisi manatu, atonu e mafai ona faaaoga i ni mea foi nei o semina faapitoa, e o ai ia latou e nonofo ai i totonu mo le vaiaso e faaaoga mo mea o retreats. Ia o lea foi.. e masani ona fai ia retreats a isi Matagaluega ia ma o i faletalimalo taugata ae na i ai fale e mafai ona faaaoga.

Lau Afioga i le Fofoga Fetalai, o nai tuualalo e fesoasoani i lau Afioga i le Minisita mo le faaleleia o le tautua i lo tatou atunuu.

FOFOGA FETALAI: Ia malo faafetai, talitonu o lea foi ua faafofoga ma le totoa le Afioga i le Minisita. O la ou te vaai atu o la e fai ma faamaumau i lalo ia malo faafetai.

Ou te talitonu foi o lea ua maea seivagana ua e pai i lou itumalo faapea ua e pai analeila, ia lelei ma faaauau mai ia le saunoaga.

Afioga Hon VALASI LUAPITOFANUA TOOGAMAGA TAFITO SELESELE: Faafetai e le toe umi lau Afioga i le Fofoga Fetalai, faatalofa atu ma e toe afe atu lou itumalo, ia ua outou faafofoga i le ta lauga, aemaise ia le Matagaluega o le Soifua Maloloina.

O le sao ua tuuina mo Samoa i lau faafofoga o taua lena. Vaisigano 2, ou te ofo foi pe a toe alu ese lou tofi, i lenei 5 tausaga ma le isi 5 tausaga. Ia o lea ua seei i le Minisita, ia aemaise o le Minisita lea e vaaia uma lava gasegase o le atunuu, vaaia tagata mamai ia ae sao ai le Afioga i le Taitai, masalo e tatau ona aumai ni mea faapena e siaki ai... aua o le faitau aofai o tagata lea ua tapena, o lea ua mautinoa e tatau ona, e ova ma le 500 tagata. Ae o tagata la e gasolo atu i le falemai i le taimi lenei, ua na o le 40 na ona tupu. Ae o la ua fautuaina e o atu e faamama e fai mea ia. E pei o le polokalame lea e saunoa ai le... Ae ui i lea, ia faafetai tele, ia manuia Samoa, manuia le itumalo, ia manuia le Matagaluega o le Soifua Maloloina, ia manuia le Palemene o Samoa, soifua.

Na faaalua le agaga fiafia o le Maota i le patipati o latou aao i le maea ai o le Saunoaga Talifuaitau a le Minisita mo le Soifua Maloloina.

FOFOGA FETALAI: Ia faamalo faafetai i le saunoaga a lau Afioga i le Minisita o le Soifua Maloloina. Ia e talitonu lava o le soifua maloloina

o se atunuu ia o se atunuu manuia lea. O lea foi ua faafofoga ma le totoa le paia o le Maota ia aemaise foi o le faafofogaaga a Samoa ia malo le galulue. Aemaise foi le Pule Sili ma le mamalu o le Matagaluega aemaise foi le tatou Komiti o le Koviti. O lea lava ua oooo i ai lau faafetai ia ma le talitonuga foi lena, ia o le ala foi lea o le malupuipuia o le atunuu, ia ona o le faamaoni o le Komiti ia aemaise o le aufaigaluega.

O le mea lea faafetai tele i lau Afioga i le Minisita ia aemaise foi o le mamalu o le Matagaluega. Ia o lea ua oo mai i le Minisita o Leoleo ia ma le Ola Toefuataina ma le Ofisa o Faigapalota, ia tulai maia lau Afioga i le Minisita mo lau saunoaga.

Afioga Hon FAUALO HARRY JEFFREY SCHUSTER (Minisita mo Leoleo ma le Falepuipui): Tulou lau Afioga i le Fofoga Fetalai, faafetai tele mo lou avanoa. Tulou lau Afioga i le Palemia, lau Afioga Fiamē Naomi Mataafa le uluai Palemia tamaitai o le tatou atunuu. Tulouna foil au Afioga i le Sui Taitai, lau Afioga Tuala Ponifasio, mamalu o Minisita o le Kapeneta. Tulouna foi lau Afioga i le Taitai o le Itu Agai, le sa tu i le foe mo tausaga ua tele. Tulouna foi lau Afioga i le Sui Taitai, tulouna lau Afioga i le Fofoga Fetalai, aemaise sui usufono mamalu uma o le Fonousu a Samoa.

Tulouna le aao tusitusi o le Maota Fono, ia ma le aufaigaluega. Tulouna foi le mamalu o le aufaigaluega o Faauluuluga o Matagaluega a le Malo ma Faalapotopotoga a le Malo. Ia malo lava le lagi e mama ma le soifua maua i lenei itula o le aso.

Ia ae e le i amata ona tali ia fesili, ia e muamua lava e fia momoli atu le... faamauina le... momoli atu foi o se faafetai tele, faamalo i lau Afioga i le Taitai o le Itu Agai, o le sa taitaiina ia lo tatou Malo i le tele o tausaga ua tuanai atu. E maualuga le vaai i lau Afioga, ona o lou soifua tautua ma le auauna i lo tatou atunuu. E maualuga le vaai ia te oe i le tulaga lea, o le tele o tausaga na e tautua ai, ma e taitai ai. E le gata i lea, e tele foi ia o galuega lelei sa faia e lau Afioga, faapea le Vaega Faaupufai a le HRPP. O lea la lau Afioga faapei o isi sa saunoa muamua, faafetai i lau Afioga mo lau tautua. Faamanuia tele pea le Atua i lau Afioga.

Ia o lenei foi taimi e fia momoli le faafetai i le Pulega o le Matagaluega o Leoleo, le tamaitai ia Monalisa Papalii Tiai Ketī, mamalu o le Ofisa ia ma le Afioga ia Afamasaga Sam o lo o vaai le Falepuipui ma le Olafuataina. Malo le galulue malo le faatino o tiute i lenei taimi ia ma taimi foi ua tuanai atu. E faapea foi ona momoli le faafetai ia Tanuvasa Mauga Petone ma le aufaigaluega. O ia lea o lo o faauluulu i ai le Ofisa o Tineimu ia ma le uluai fesoasoani mo faalavelave faafuasei. Malo le galulue.

Ia faapea foi ona avatu le faamalo ia Faimalotumua Mathew Lemisio, le Alii o le Komesina o Faigapalota ia ma le mamalu o le Ofisa, malo le galulue malo le tautua i lo tatou Malo.

Ia e feoloolo lava nai sui usufono na laga ni mataupu i nei Matagaluega e tolu. Ia o le a tali atu i fesili ia sa laga, ia e ui i sui usufono sa i ai, ia ae e tai tutusa lava mea sa laga i a outou lauga i le taimi ua tea atu. Sa laga

e sui usufono ia le tulaga lea i moli taavale foi ia e feoai i le alatele, moli ia e ese atu i moli na faatau mai ai le taavale la e i ai, lea e tau e tatou o spotlights, ia faapea foi ia pu leotetele o taavale lea e feoai. Ia ma speakers leotetele o taavale, sa matauina e latou o le tele ia o le faalavelave i faigalotu i le afiafi. Ae e ui foi i lea, o moli ia e ono tutupu ai ni faalavelave ia ona e sesega ai mata o isi avetaavale. Ia e faapea foi i speaker leotetele ia, ia e faateia foi ia tagata matutua.

I tulaga i moli, o lo o i ai le Tulafono i le Ofisa o Leoleo i lenei taimi, e mafai ai e leoleo ona aveese ia moli ia e le talafeagai ma e le o faatagaina e le Tulafono. Ma o lo o toe teuteuina foi le Tulafono a le Matagaluega ma le Ofisa o le Loia Sili i vaega sa faasea atu ai le atunuu i le i ai o moli ia. Ae e i ai la le tulaga e i ai nisi o auaunaga e manaomia ia ituaiga moli ia e tai pei o kamupani ia e fai ia latou security services e latou te manaomia ia moli ia.

Sa talosaga foi la e le aufaifaatoaga, e manaomia foi e latou moli ia i latou faatoaga i tua. Ia o lea la e tagai i ai le Matagaluega e tapu le vaega e le tatau ona i ai ia moli ia, ae faataga ia le isi vaega ia e manaomia ia moli ia.

O le tulaga i speakers, o le Tulafono o lo o i ai i le taimi nei, o lo o faasaina ia speakers ia i taavale a le Malo, ae e le o au la le Tulafono i taavale ia a tatou e umia saoloto. O lea foi la e galulue ia le Matagaluega ma le Ofisa o le Loia Sili, e teuteu ia le Tulafono, ina ia maua le tulaga lea ia au foi ia le Tulafono i taavale ia e umia saoloto.

E faapea foi i le tulaga lea i pu leotetele, o lo o i ai se va foi lea i le Tulafono, ona o lo o faasa le mea lea e faasa foi speakers i autafa o fale Faamasino, o Aoga o Falemai ma fale o faifeau, ae e le o lavea ai la ia vaega foi ia lautele e pei ona faasea mai ai sui usufono i totonu nuu. Ia o lea foi la e tilotilo le Matagaluega ma le Ofisa o le Loia Sili i le toe teuteuina o le Tulafono, ia mafai ai ona faasa ia taavale ia i tulaga o pu ia ua leotetele tele.

Sa laga e le toatele o sui usufono le faaleleia o Ofisa o Leoleo o pou ia i o latou itumalo. Ia o le masina fou lea ua faamoemoe ua logo mai ai maua ma le Minisita Lagolago e le Matagaluega o Leoleo faapea le Matagaluega o Fuimu, o le asiasi atu ai i pou uma ia o Fuimu ia ma pou o Ofisa o Leoleo. E tagai foi o a ni faaletonu o Ofisa, po o a foi ni mea e toe manaomia e faaleleia atili ai le auaunaga.

Sa laga foi e se tasi o sui usufono ia le tulaga lea i auaunaga mo leoleo ni koleniga foi ia e fai i isi atunuu i fafo. Ia o se fautuaga lelei lea fautuaga ma o le taimi nei, o lo o i ai ia le polokalame o lo o faagaioi e le High Commission o Ausetalia. Ma o lo o faatalanoa foi ma Niu Sila le tulaga lea, ia mafai e le tatou Ofisa, ona asiasi atu e fai ia placements i Ofisa foi o Leoleo i isi atunuu. O se tulaga lelei mo le faaauauina o le tapenaga o tatou tagata mo le tauaveina o latou tiute.

Sa laga foi e se tasi o sui usufono i tulaga lea pe mafai ona toe faafoi Ofisa o Leoleo i le tulaga lea sa i ai muamua ae e le i faakonekarateina ia le Komesina faasolo mai isi vaega o le Pulega, tulaga o le tutoatasi o le Ofisa o Leoleo. O se fautuaga lelei ma o le a tilotilo foi i ai i lea tulaga.

O le tele o fesili agai mai i le Matagaluega o Leoleo, o fesili i le faatinoina o tiute o leoleo i le taimi lea faatoa tuana'i atu nei.

Ia e momoli atu le faafetai tele i lau Afioga i le Taitai, i le tofa foi sa e faaalua ma le fautuaga, i le tulaga foi i le faaaogaina pea o le aganuu i le faatinoina o ona tiute. Ia sa faapai foi i le sui usufono o Anoamaa Nu.1. Afioga ia Alaiasa i lea tulaga. E tutusa lelei o tatou manatu i le tulaga lea, o tatou i Samoa, e tatou te ui lava i tu ma aga faaSamoa muamua, e le alofia ia lea tulaga.

E tatou te iloa uma lava... e le atoa se afe o leoleo o Samoa atoa, e le mafai e leoleo ona puipui Samoa atoa pe a vevesi. O puipuiga muamua o Samoa o Pulega a Alii ma Faipule ma o leoleo ia, o leoleo a tatou o le Malo ma tatou uma. O leoleo foi ia, mo Alii ma Faipule o Samoa uma. Ma e tatou te talitonu faatasi i le tulaga lea. E pau lava le mea, i ai lava le taimi, e gata le tu ma le aga e faatino lava tiute o leoleo. O tiute la o leoleo, ua faataatia manino lava Tulafono a Leoleo i le 2009, ia ma le Tulafono o le Malosiaga o Leoleo, i le Police Power's Act i le 2012, ae faapea foi ona i ai i leoleo le malosiaga mai i le Common Law e pei ona i ai malosiaga o le Constable mai Peretania.

Mai i le faataotoga o malosiaga o leoleo ia o latou tiute ma galuega fai, e na o leoleo lava e i ai ia le malosiaga faale-Tulafono, e mafai ai ona o latou taofia se tagata ma molia. O le Ofisa o Leoleo la, e patino ia latou ia le malosiaga lea. E leai i se isi o tatou, ma e leai foi se tulaga o i ai i le Minisita, po o se isi lava tagata, e mafai ai ona faatonu se alii po o se tamaitai leoleo i le faatinoina o le tiute lea pe a latou vaaia, pe molia atu foi e se isi se tagi i se isi tagata ua solia le Tulafono. O latou la e pau i ai le tiute lea.

Ae e ese foi le lotoleaga o le... e sese le upu. O le Tulafono e le gata i le malosiaga lea ua ave i alii ma tamaitai leoleo e taofia ai ma molia se tasi, ae malosi foi le Tulafono i le isi itu. O le puipuiga o le Tulafono, e faatino e leoleo ia o latou tiute i ala o le Tulafono. E sili atu loa foi le faatinoga o tiute o leoleo i ala o le Tulafono, e faatonu mai e le isi maota paepae la e faasaga mai o, e sese leoleo. Ma ua oo foi i ai lo tatou Ofisa i le tulaga lena. O le tele ia o su lea na i ai, pe o le 5 i le 10 tausaga ia ua tea atu. O le tele ia o tupe na totogi, ona ua su e tagata o le tatou atunuu, ona ua oia le latou aiatatau i le faatinoina o tiute o leoleo, pe ua sese le faagaioiga ma le faaaogaina e leoleo o lo latou malosiaga faaleoleo i le taimi na faatinoina ai o latou tiute. Ma o le tulaga foi lea, a oo i le taimi e...e ave lava le avanoa i leoleo. Ma ua ou matau foi, faatoa 6 vaiaso o ou Minisita o Leoleo, ua ou matau foi i le faiga o le latou galuega, e ui lava latou muamua i le aganuu. Ae i ai lava le taimi, e gata ai le aganuu, ae tatau loa ona faatino tiute o leoleo, i luga o le Tulafono. Ma o i ina la e le gata i le manino o tiute o leoleo e tatau ona faatonu, ae o lo o manino foi, le auala e le tatau ona sili atu ai. Ia faaoga sao le Tulafono i ala o la e faataatia mai e le Tulafono.

Sa laga e se tasi foi o sui le tulaga, po o ai e faamalosiaga le Tulafono, o le fagota ma le faaletatau o fugafuga ma isi figota o le sami. Atonu o le tulaga lea na tulai mai i Vaitele. E manino lava le Tulafono. O leoleo, e

so o se solitulafono i Samoa, e mafai e leoleo ona fai le suesuega, ona o latou lea e i ai le malosiaga faalauaitete lea. E tusa lava pe o le Tulafono Faatonutonu a i latou, po o se Tulafono Faatonutonu a se isi Matagaluega. A i ai se solitulafono i totonu o Tulafono Faatonutonu na, e i ai foi le malosiaga o leoleo, e faamalosi ai le Tulafono lea.

Ae o lalo o le Tulafono a le Fisheries, o lo o i ai moliaga ia, pe a fai le Tulafono lea. O le tulaga o lo o faatino nei, e fai e leoleo suesuega ma moliaga ona toe faafoi lea i le Matagaluega o Faatoaga ma Faigafaiva, o lo o i ai foi lo latou Ofisa loia, o latou e faatino le faiga o moliaga i i, i le Tulafono.

Sa laga e se tasi o sui usufono le totogi o leoleo. Ma o se manatu manaia foi. I le faatalanoaina o le Ofisa, e i ai le tulaga foi lea, a tau talanoa leoleo i le sii o totogi, ae faatutusa le tilotilo a le PSC i totogi o isi Matagaluega a le Malo, ona fua foi lea o totogi o leoleo. E tatau lava ona ona uia le tulaga lea. E pau lava lau vaai i ai, i Matagaluega ia e 2, o Leoleo ma Falepuipui ma le Toe Fuataina, faapea le Tineimu ma le Fesoasoani muamua. O le eseesega o le auauunaga lea ma isi auauunaga a tatou o Matagaluega a le Malo, e pau ia o auauunaga e 2 e mafai ona e usu i le galuega i le taeao, ae i ai le avanoa e te ono maluu i le faatinoina o ou tiute.

Ona o tiute o lo o faataatia mo leoleo, i le tausia o le filemu, puipui meatotino, tausii le Tulafono, faamalosi le Tulafono. O tiute foi o le Fuimu, e tutusa la tiute lea o le Fuimu ma Leoleo, o le tausii o le saogalemua o tagata ma le puipui meatotino. O le tulaga la lea, e tele le aafiaga, tele le risk i leoleo ma le au fuimu, e ese mai i isi auauunaga a tatou, e auauuna i le public service. E masalo o se tulaga lea e tatau ona laga ona o le matafaioi lea a le PSC, e laga se tulaga faapea se i toe tagai i ai.

Sa laga e se sui usufono mo le Tineimu, le tulaga i le taavale fuimu mo Aana. O lo o i ai le taavale fuimu i le malaevaalele, aepeitai na faamatala mai e le pule o le Tineimu. O le Tulafono lava ia e faatatau i le malaevaalele, e tapu le faaogaina o le loli tineimu a le malaevaalele mo mu ia e i fafo ma le malaevaalele. Ae ua uma ona faataatia e le Faigamalo ua uma atu nei, le fuafuaga e aumai taavale fuimu mo le atuAana ae tuu faatasi i i, i le malaevaalele, ae faataga lava la na o taavale fuimu ia e ave e fesoasoani foi i le malaevaalele. Ae a tupu se mu i le itulagi lea, o taavale ia e omai e fui mu i le atu Aana pe a faapea e tupu ai se faalavelave tau mu.

Mo le Ofisa o Komesina ma Faiga Palota. E i ai talosaga na laga e sui usufono, e faatatau i Tulafono mo Faiga Palota. Ma o nisi o mataupu ia, o lo o i ai i le Tulafono Tau Faaofi, lea e uma tatou tilotilo i ai, mo nai suiga i le Tulafono o Faiga Palota, e faaoga mo le palota laititi o lo o loma nei.

O lo o i ai le talosaga mai se sui usufono, mo le faaopoopo o se sui faipule mo le pule i Asau ma le pule i Saleaula.

O lo o i ai foi se talosaga a se tasi foi o sui usufono, na laga ai, pe mafai ona toe tagai i le tulaga o lo o i ai Aleisa. Ona o lana ia silasila, e pei e

feteenai le i ai o Aleisa i totonu o Sagaga Nu 3, a o o lo o i ai le alalafaga o Leauvaa.

O lo o i ai lona manatu, e tatau ona faaese se faiga e fai ai Aleisa mai le latou afioaga.

Sa laga foi le tulaga i le faiga palota, pe mafai ona...laga e le sui Taitai, tulaga o tupe i campaign ia e su ai e isi sui ia isi sui i le faaaogaina o tupe. O lona manatu na faaali mai, pe le mafai ona tilotilo i se tulaga o se vaega tupe. Faataitaiga pe se \$30,000, faataga sui ona faaaoga se tupe e oo atu i le \$30,000 ae lipoti le tupe lea i le Komesina o Faiga Palota, ia aua ne i sili atu, ma ia oo foi i le tulaga lea, ia aveese le mea lea o le i ai i le Corrupt Practice List, le faaaogaina o le tulaga lea.

Sa laga e se sui usufono, ia suiga e fai i Tulafono o Palota, ina ia faatapulaa le taimi e fai ai suiga. E fua i le taimi e fai ai ia Faiga Palota.

O tulaga uma ia, i lau vaai atu i ai, e talafeagai lava le ave o manatu uma ia e pei ona laga e sui usufono, e silasila i ai le komisi masani lea e faatu, pe a uma le faiga palota, i ni suiga talafeagai, i le Tulafono e faafoe ai faiga palota pe a maea se faiga palota. O lea e loma le faatuina o se komisi faapea.

O lo o i ai foi se fautuaga taua, o lo o aumai e se tasi foi o sui usufono, i sui o lea komisi. O le manatu o lo o aumai pe le mafai ona tilotilo i ni sui o le komisi ni tagata tutoatasi, e le o ni tagata sa faipule muamua po o ni tagata na pauu i le faiga palota lea na tea atu nei, e tai pei lava o le tulaga e masani ai. O se manatu lelei foi, e ao ona tilotilo i ai, mo le komisi a faafoe nei.

E tasi le mea ua misi ia te au, sa i ai le talosaga o le sui o Anoamaa Nu 2, le afioga i le amotasi a le Tuiatua, i se pou o le Ofisa o Leoleo i Anoamaa. O nai mataupu ia sa laga, mo le Matagaluega e 3 ia e i lalo o lau vaavaaiga.

A faapea e i ai ni fesili, e fia tali atu i fesili.

FOFOGA FETALAI: Malo saunoa i lau afioga i le Minisita. E talitonu o lea ua maua le avanoa ia outou sa laga ni manatu mo le Matagaluega. O lea lava e mau i i, ia suafa o i latou na fai o latou manatu. Tulai mai le sui mamalu mai Anoamaa Nu 1.

Afioga Alaiasa Moefaauouo Malagaitutogiai Sepulona Moananu: E faafetai mo le avanoa i lau Afioga i le Fofoga Fetalai. E faafetai foi i le saunoaga a le Minisita. O lea ua matau atu faaiuiu nai mea foi na laga i matou lauga. O lea ua maua lelei lava le auga o le talosaga sa avatu i lau afioga i le Minisita, i le tulaga sa matauina i le vaitaimi sa i ai. E pei o soalaupulega lava i le tatou aganuu. E faatoa tatou agai lava i le malosiaga lea, pe a faapea ua siliga taliiseu le tulaga o le vafealoaloi.

Ae sa i ai le mea na ou avatu ai le faataitaiga i mea o lo o tutupu i fafo, i le malo o Amerika, o le Black Lives Matter. O mea nei, ua mafua mai o le faailoga lanu, discrimination ma le abuse of power. I lau la vaai i nai matou taimi ia na matou i ai, e pei ua faasagasaga, e te ofu lanumoana loa e faasagasaga mai, e pei ua ou vaai atu lava ua agai i le ituaiga auala

lea. Ma le faaaoga foi lea e taofi mai lava i o, i le taamilosaga i o, a o lea e le i oo mai i le matou... E pei o nai mea na o lea ou te tuualalo atu ai. Sa leai muamua, ae faafetai o lea ua e taua mai, ua malie foi le matou fesili.

A o mea na e 2 na mafua ai, e oo loa le mea i le mea lena, o lona uiga ua ese foi le tulaga i la matou matau. Ae faafetai, faafetai i lau afioga mo le faamalamalamaga o le tatou faamoemoe. Ia manuia le tatou Fono.

Tofa Hon Olo Fiti Afoa Vaai: E tasi lava si mea lea e tau ina faamanatu atu i le afioga i le Minisita o Leoleo. O lo o i ai ia le vaega 79 o le Tulafono o le Aviation Security, e mafai ai ona molia, ma arrest e security se na te solia le tulafono a malaevaalele. Ne i te i ua le aware i ai o tatou tagata, ae faafuaseia ai le arrest i o i le malaevaalele, ae tau ina faamanatu atu ma le faaaloalo.

Afioga Hon Tapunuu Niko Lee Hang: Lau Afioga,

FOFOGA FETALAI: E pei ou te le i vaai i lou igoa i i.

Afioga Hon Tapunuu Niko Lee Hang: Sa taua i lau lauga. Faafetai i lau Afioga i le Fofoga Fetalai mo le avanoa, e leai o lea sa ou taua i lau lauga lau fesili na fesiligia ai le Minisita. O le naunautaiga lava ia fai se ai o nei mea na tutupu, ina ia aua e i toe tulai mai. Sa ou fesiligia le Minisita, ona e loia toe faamasino. O le saunoaga a se sui mamalu, ou te le toe taua ni igoa ma ni saunoaga, ne i te i foi ua toe tu'i ma au.

Ae o lau talosaga i lau afioga, se i tagai ane i mea ia na tutupu. E le toe taua ni igoa ma ni saunoaga, ae ona o le taua o le toe lagalaga atu. O lau matau ma lau talitonuga, o le faatupulaia o sauaga o tina ma tamataitai. O lau tatalo, se i tagai ane i ai lau afioga ae taofi nei mea. E leaga ou te talitonu lava, saunoaga ia faapea aemaise pe a vaai atu i Taitai o le atunuu, Tama o Itumalo, ae tatau ona fai se fuafuaga i ai e taofi aua ne i toe tulai mai. O si au talosaga lena i lau afioga, ae tatau ona fai se iuga o nei mea, taofi ai i i, ne i saunoaga faatupu faalavelave faapea. Ma lou faaaloalo lava.

Afioga Hon FAUALO HARRY JEFFREY SCHUSTER: Lau Afioga faamolemole se i tali muamua. Faafetai Tapunuu mo le manatu. E pau o le mea ou te iloa e faamanino muamua. E leai, leai se taimi faapea na ou fai ai se faatonuga i leoleo i se mea e fai pe le faia. E faasa au e le Tulafono i le mea lena. E le mafai ona ou faatonua leoleo i se mea. O le tulaga lava ia i le faatinoina o tiute o leoleo. A i ai lava se mea ua soli le Tulafono, o leoleo foi e sulu i ai, o lea ua soli le Tulafono, fai le tagi. O le tagi lena, a fai le tagi ae le faataunuuina e leoleo i le soli o le tulafono, ua le savali la leoleo i le Tulafono. E so o se isi lava o tatou, po o fea e tupu ai le solitulafono, a vaai le leoleo i le solitulafono e i ai lona tiute i le tulafono e fai le moliaga. A e a i ai foi se isi e fai se complain, e tatau foi i le leoleo ona fai le moliaga e le mafai oa alofia le tulaga lena.

O le tulaga la lea, o le faamalosia o le tulafono o tatou foi, aua a e talitonu e i ai se soligatulafono na tupu i lou tagata pe na e vaai i ai, e mafai lava ona fai lau tagi i le Ofisa o leoleo ona faaauau lea e le maota paepae la e tu mai o. E pei ona ou fai atu muamua, a sisi foi le leoleo i le faatinoina o latou tiute, o le severe foi ia o le tilotilo a le faamasinoga i le faatinoina e leoleo o latou tiute. E vaai loa le faamasinoga e sese se mea a leoleo na fai, e muamua lava ona faatonutonu mai e le faamasinoga, ma fai mai ma le faamasinoga, e oo lava i le tulaga lea e faasala le leoleo e oo lava foi ina falepuipui. Ma le tulaga lea sa tupu foi i nai isi na avatu, na totogi lava e leoleo ia le...e tele le tupe na totogi e leoleo ona o le complaint a le tagata ua oia lana aiatatau i le faatinoina o tiue a leoleo. E na o se tulaga faapea.

A o le tulaga lava ia i le aganuu ma le va faale-aganuu, e leai e le taofia le tulaga lena. Ae a oo loa i le taimi ua tataua ona faatino le tiute, e le mafai la e leoleo ona faaoga le aganuu e faatino ai le tiute faaleoleo, leaga o le tiute lena o la e i lalo o le tulafono.

FOFOGA FETALAI: E faafetai o lea ua manino.
Tulai mai lau Afioga i le sui Taitai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leaga o lea sa afea foi i le saunoaga malamalama i le afioga i le Minisita ia se mataupu sa ou laga.

FOFOGA FETALAI: Ia, o lea e faamaui, o lou pou i tua.

Tofa Hon Lauofo Fonotoe Nuafesili Pierre Lauofo: Ioe, o le mafuaaga lea lau afioga i le Minisita, ua uma ona ioeina, ae pei ona ou fai atu, e i ai le mafuaaga e pei ona toloa ai. Ae o la ua i ai le fanua ua avanoa. Aua e pei ona silafia mea faapenei, e fiu e tausaili ni fanua, ona e tele lava o fanua faale-aganuu, e tele faalavelave, ma tele finauga e fai i fanua faale-aganuu i tua atu o Apia.

A o i la ia matou, i le afioaga o Saluafata, o la ua leva ona faaavanoa mai le fanua mo le faamoemoe lea. E pei foi ona ou taua i lau lauga, i le Afioga i le Minisita o Soifua Maloloina, o la foi ua i ai ma le fanua e faamoemoe mo le falemai, pe a faapea e finagalo i le tulaga lena. O le talanoa atu lea, faafetai i lau afioga.

Tofa Lealailepule Rimoni Aiafi: E faafetai lava i lau afioga i le Minisita. O le taua o le aso lea lau Afioga, o le tele foi o mea nei, aua e pei lava ona tatou vaavaai i ai, e le i tupu muamua i Samoa. I lau lava faafetai, ua tele le suiga o le Matagaluega o Leoleo, ua tele suiga lelei ua i ai i le faatinoga o le galuega.

Peitai i le aso lava lea, mo le agai i luma, o la lava tatou te iloa, o le Common Law is Commonsense, is the Common Law. O le uiga o le faamatalaga, i le taimi na matou o mai na o matou o faipule na omai i i, Was it necessary e manaomia ni leoleo se selau (100) e vaai matou i i,

fai atu ai foi. Na o nai toeaia lava ia, o tagata foi e faia le Malo. Ae tatalo mai i ai, e tasi lava si leoleo. A tatou vaai i aso ia, e toatasi lava le leoleo e fealuai i le taulaga, po o le malaetaalo, e filemu uma lava tagata. Ae matou omai foi i luga i o, ae o atu ma talita, ae toe lava o matou.

Mo le agai i luma, e oo foi i le taimi na omai ai faifeau o le lotu soofaatasi, sa le tatau ona faasavavalia mai o. I le va mo unwritten policies ma laws na e ola mai loa le tamaititi Samoa, pe leoleo pe le leoleo, ae i ai lava lona...le va fealoai o tatou, o le faavae lava lena ma le mea e savavali ai tatou. E pei o le tulaga lena, a o isi mea, e leai faafetai i le Matagaluega, faafetai atu foi i lau afioga manuia ou faiva.

FOFOGA FETALAI: O lea ua maua le saunoaga.

Susuga Hon Tuilaepa Fatialofa Auelua Sailele Malielegaoi: O au ua fai si leva, sa umi foi o avea au ma Minisita o Leoleo. Sa ta faafeagai foi. Ua ou malie i le faamalamalama i le afioga i le Minisita, ona o le tulaga tonu lava lea, sa i ai foi i lou taimi. E le feaiaa'i ae taua foi le faafogafoga mai o le Minisita o Faatoaga. [.....].

Susuga Hon Laauli Leuatea Polataivao Fosi: Lau Afioga i le Fofoga Fetalai, e le tatau ona tuualua le mea lea.

Susuga Hon Tuilaepa Fatialofa Auelua Sailele Malielegaoi: Onosai mai se i uma.

FOFOGA FETALAI: E le feaiaa'i mea lau Afioga i le Taitai o le Itu Agai.

Susuga Hon Laauli Leuatea Polataivao Fosi: Tuilaepa e sese, e pepelo o lea foi o le a toe fai. E leai se mea faapena na tupu. O lea o le a e tau sese ai le mea lena. Ua uma le mataupu, Peseta, ua uma le ta mataupu. Malie lou finagalo. O la e silasila le Atua.

Susuga Hon Tuilaepa Fatialofa Auelua Sailele Malielegaoi: O le mea la lena ua ou fiafia ai. O lou fiafia ai, se i uma atu le mataupu, malie mai.

FOFOGA FETALAI: Malie mai lau afioga i le Minisita o lea o le a ou talanoa i ai.

Susuga Hon Laauli Leuatea Polataivao Fosi: O le a e toe alu lava e toe laga mai le mea ua uma.

Susuga Hon Tuilaepa Fatialofa Auelua Sailele Malielegaoi: O le ala lena ua ou fiafia ai, i le saunoaga a le Minisita.

Susuga Hon Laauli Leuatea Polataivao Fosi: E le sao..

Susuga Hon Tuilaepa Fatialofa Auelua Sailele Malielegaoi: Aua o le saunoaga a le Minisita, o le mea tonu lava lena na ou faia.

FOFOGA FETALAI: Agai sao i o i le Minisita o Leoleo.

Susuga Hon Tuilaepa Fatialofa Auelua Sailele Malielegaoi: E sao lelei. O lou fiafiaga, o lea ua faamatala mai, e aoga mo Minisita uma lava mo le lumanai, e vaaia le Ofisa o Leoleo. E lafo lava i leoleo e fai le latou faamasinoga i le mea e tatau ma le mea e le tatau. O lona uiga la, ua fai lava si ova o mea ia na fai e leoleo lava latou. Ae taua tele le tulaga lea, o le aganuu. E leaga e fetau lava le matou o mai i le faaiuga o le 1982, ae tupu loa mea i o i le va o le Malo ma Satuimalufilufi. O lea lava na faafofoga i ai. E masalo o lea na i ai i le taimi lea. Na matua masii uma mai le nuu, ma upu na fai, e liuefuefu lava le nuu. O le a le mea na tupu? Na fofu lava i le aganuu, ma uma filemu ai le mataupu lea, e manu lava e oti tagata. E le gata o Satuimalufilufi ae faapena foi i leoleo.

O le mea la lea, ou te faafetai ai i le tulaga o agaifanua, lea e fofu ai. e sao le saunoaga a le minisita e i ai lava taimi e laa ai leoleo i le tulaga o le faatinoga o latou tiute. A o Samoa lava ia, e fofu lava ana mataupu i le faale-aganuu. A fai loa ua le mafai, ona faatoa faaaoga loa lea o le malosi faaleoleo. O lea foi na tupu i Savaii, tupu i Siumu, tupu i Savaii i le masina o Setema, lea na tatala ai tatou taavale ae taofi e Salelologa.

FOFOGA FETALAI: O lea ua maua atu.

Lau afioga i le Fofoga Fetalai pe maua se avanoa, ona o lea e maua atu ua taua le itumalo.

Susuga Hon Tuilaepa Fatialofa Auelua Sailele Malielegaoi: O le vaega e lua, se i faatali mai lava leaga e taua mataupu ia sa laga.

O le tulaga ia o le faatutoatasi. E i ai le manatu foi lele, a tutoatasi ona pule lava lea o le Matagaluega i totogi. E faigata tele ona ausia tulaga na aua o lea ua faataoto ia le fuataga o totogi, ina ia faalaugatasia uma vaega eseese uma, ma taofia ai ia faaaitauli na tulai mai i le 1981 i le Tete a le PSA. O lea ua agai uma i ai le faatulagaga o totogi ina ia taoto i se vasaga ia lelei, e maua ai le malie o lea vaega ma lea vaega.

O le vaega e tolu, lau afioga o le taavale fuimu. E muamua atu sa le mafai ona feaiaa'i mea ia e lua. Ua tatau ona taofi ia fuimu i o i le malaevaalele mo ni faalavelave e tutupu mai pe a faimalaga mai vaalele. O le afi lea na tupu i tai lea na mu ai le tane suauu, o se afi a na le lelei ona faafoe, e ono mu uma ai le taulaga.

O le ala lea na fai ai le teuteuga, a oo loa i le taimi faapea i le avanoa ai o taavale fuimu ona mafai lea ona faaaoga. O le tulaga lea i le talosaga lea mo se isi nofo a Pule. E tele le faavae na toe faatulaga ai ia Nofoa o itumalo. Ina ia taumafai e taoto lelei se vasaga lelei o itumalo, i le aofai o tagata i lea itumalo ma lea itumalo.

O lea la na fai ai teuteuga. O le laasaga muamua o le faafoi uma o itumalo, i le taitasi itumalo, tasi le faipule tasi le palota a le tagata ina ia

tutusa uma itumalo. E tele lava le galuega na faataoto i ina, o lea la na toe faatulaga ai loa le tatou palota, ma iu ane ua faaopoopo le Nofoa lea sa saunoa i ai le afioga ia Sala ananafi. O lea la ua manuia ai Tuala. O le faatulagaga lena, ina ia vasaga lelei a tatou itumalo. O le ala foi lena, na le toe faalupea ai i le upu lea, itumalo faaalalafaga, ae ua sui itumalo faapalota. Ona o vaevaega o itumalo, o mataupu lava tau palota, ae le aafia lava a tatou tu ma tatou agaifanua. Ona pei ai lava lea o fomai. O tofiga faale-malo e mafai ai ona aafia ai ni itumalo se 2 po o se 3 i se tautua a le fomai.

Na ala ona taumafai atu e faaumi le vaega lea, ia malamalama ai le Maota lenei, leaga e lavelave ia le mataupu. Manuia tele lau Afioga i le Fofoga Fetalai.

FOFOGA FETALAI: O lea ua maua, taatia mai. O lea foi ua i ai le isi suiga Faigamalo, e faapena lava.

Ou te talitonu o lea ua maea le taimi..

Tofa Seuamuli Fasi Toma (Gagaemauga 2): Leaga o lea sa lavea i lau lauga faamolemole. O lea ua matau atu e pei ona saunoa le Minisita o lea foi ua saunoa le Taitai o le Itu Agai, i le faamaluina o pulega alii ma faipule

Afioga Sulamanaia Fetaiai Tauiliili Tuivasa: Pe ua ave le faatagaga i le sui usufono lea e saunoa. Pe o lea ua sau a ia.

FOFOGA FETALAI: E leaga e le o i ai foi lou suafa i i Sula.

Afioga Sulamanaia Fetaiai Tauiliili Tuivasa: Na ou lauga ai lau afioga i le Matagaluega lea.

FOFOGA FETALAI: Onosai mai, saunoa mai.

Tofa Seuamuli Fasi Toma: O lea sa aafia i se faamatalaga le tulaga o le teuina o le lotoa. E pei la o lea e le i oo i ai se finagalo o le afioga i le Minisita, ona o lea ou te tilotilo atu i le Tala o le tupe, e \$100,000 mo le faamamaina o lotoa. Ae o le lotoa lea o le Matagaluega o Leoleo, lea e i totonu o le nuu lenei, lea e tu i le ogatotonu. O le mea lea e tatalo mai ai, pe le alagatatau ona teu e le matou nuu le lotoa, aemaise foi o le moaina o le vao, ae avatu sia seleni. Aua e pei e le malie lea mea o le tausii e le matou nuu o leoleo, ae ese le tagata e agai i ai le faamanuiaga. E pei o se agaga lea ma le faafetai.

FOFOGA FETALAI: Tulai mai lau Afioga i le Minisita.

Afioga Hon FAUALO HARRY JEFFREY SCHUSTER: O le tali o lau fesili, lea na ou fai atu e alu atu le asiasiga i pou uma ia, ma vaai i tulaga ia. O lea foi la matou te o atu ma tagata o le ofisa, aua o le suiga

lea e te manao i ai, e leai se feau a au i ai, e feagai la outou ma le Komesina ma le ofisa lea e o atu ona ave lea i ai le tou manaoga. Aua e maumau le taimi e aumai ai ia te au e leai sau pule e fai ai lea mea. Ae ave sao i le Komesina o Leoleo le tou talosaga, ia ona iloa lea pe mafai ona fai pe leai.

FOFOGA FETALAI: Masalo o lea ua oo mai i le tatou taimi malolo, ia o lea, ma ua faaiu ai foi i i ma le saunoaga a le Minisita o Leoleo ma le... E i ai se isi mea o totoe?

Afioga Hon FAUALO HARRY JEFFREY SCHUSTER: Pe a foi mai lau Afioga, e fai lava si umi o le mea lea i lou mafaufau mo lou itumalo.

FOFOGA FETALAI: Oi, e i ai se isi mea o totoe? Ia ua lelei, o le a tatou toe taliu mai pe a uma le tatou malologa ona faauma mai lea o si mea lena e totoe lau Afioga i le Minisita.

Ia, ou te faasilasila atu ua faataatiaese nei Tualumaga a le Fono Aoao Faitulafono mo lana malologa seia toe tauaofia i le itula e 7 i le afiafi. Faafetai.

Na faataatiaese Tualumaga a le Fono Aoao Faitulafono i le itula e 6:00 i le afiafi.